

37
DISSERTATIO
MEDICO-CHIRURGICA

D E

TUMORIBUS IN GENERE,

AC POTISSIMUM

DE INFLAMMATIONE,

QUAM, DEO ADSPIRANTE ET AUSPICE
Deiparâ , propugnabit in Augustissimo Monspelienſis
Apollinis Fano , die mensis Novembris ab horâ
octavâ ad meridiem anni 1738. JACOBUS FARJON
Monspeſſulanus , Artium Liberalium Magiſter , jam-
dudum Medicinæ Alumnus , & Univerſitatis Conſi-
liarius.

P R Æ S I D E

ILLUSTRISSIMO VIRO D. D. ANTONIO FIZES,
Regis Conſiliario & Medico , nec non in almâ Monſpe-
lienſium Medicorum Academiâ Chimiæ Profeſſore Regio-
digniſſimo ; In Celeberrimâ Juris Facultate Matheſeos Pro-
feſſore ; & Societatis Regiæ Scientiarum Monſpelienſis Socio
meritiſſimo.

Ad primam Apollinarem Lauream conſequendam.



M O N S P E L I I ,

Apud JOANNEM MARTEL , Regis , Comitiorum Occitanix &

DEO UNI ET TRINO

A C

BEATÆ VIRGINI DEIPARÆ!

D. D. D. C.

JACOBUS FARJON MONSPESSULANUS.

R. R. D. D.

PROFESSORES REGII.

Illustrissimus D. D. FRANCISCUS CHICOYNEAU,
Cancellarius & Judex, Regi à Secretioribus Consiliis, Archia-
trorum Comes.

DISPUTATURI.

R. D. FRANCISCUS CHICOYNEAU, *Cancellarius &*
Judex Patris Coadjutor.

R. D. Petrus Rideux, *Decanus.*

R. D. Antonius Magnol.

R. D. Henricus Haguenot.

R. D. Jacobus Lazermes.

R. D. Gerardus Fitzgerald.

R. D. Eustachius Marcot, *Regis Medicus perpetuo Ordinarius.*

R. D. Franciscus Sauvages de la Croix, R. D. Marcot Coad-


DOCTORES ORDINARI

- D. Petrus Guisard.
- D. Guillelmus Pelissier.
- D. Claudius Chaptal.
- D. Carolus Seranne.
- D. Petrus Magnol.
- D. Thomas Fitz-Maurice.
- D. Antonius Lauffel.
- D. Jacobus Cros.
- D. Franciscus Canadell.
- D. Petrus Tioch.
- D. Honoratus Petiot.
- D. Andræas Blanc.
- D. Michaël Macnemara.
- D. Petrus Calveirac.

TRACTATUS DE TUMORIBUS.

CAPUT PRIMUM.

De Tumoribus in genere.

I. UOTIESCUMQUE partis cujuspiam moles ultra finitimarum superficiem extat, Tumorem adesse dicunt. Unde vulgaris Tumorum divisio in naturales, non naturales, & praternaturales. Quam quidem divisionem alii Auctoribus qui de Tumoribus scripserunt, in Tractationis limine sollicitè nimis tradi solitam, enucleare exempli illustrare, multò minùs circa eam disputare supervacaneum censemus. Non in hoc Tractatu de vitiosis tumoribus acturos monemus.

II. Tumor in genere, Græcis *Ogkos*, ab Hippocrate *Oidema* vocari solet. Usus tamen invaluit, ut *Oedema* tumorem specialem, de quo in proprio Capite agetur dumtaxat significet. Arabes tumorem quemvis *Apostema* dixerunt. Verùm *Apostema* abscessum significat; & ità accipitur à *Galeno* & *Celso*. (a) Sunt tamen nonnulli, ut *Paræus* aliique, qui *Apostematis* nomen ad tumores humorales speciatim designandos usurpant.

III. Vitiosus tumor vulgò dictus præter naturam est partis cujusvis aucta Magnitudo, quâ hæc ultra limites à natura prescriptos effertur, ac solita figuramutationem ut plurimum patitur, sic ut vel ob evehentem magnitudinem vel præprimis ob Causas in molem ultra modum evehentes in functionum exercitio impedimentum procreetur. Et quidem ratione duplici ex tumoribus

(a) Vid. Corrh. Def. Med. in verbo *Apostema*, & in verbo *Phlegmone*.

functiones lædi solent; nimirum vel propter exsuperantem partis magnitudinem, quæ vicinis molestiam & impedimentum parit, ita ut inde præprimis vel comprimantur, vel obstipentur, vel aggraventur, vel distrahantur; aut propter causas magnitudinem nimiam partis excitantes, quæ ut plurimum fluidorum transitum efficiunt difficilem, quæve interdum partes & situ dimovent.

IV. Causæ tumorum aut fluida sunt, aut partes solidæ, hinc prima tumorum divisio in *humorales* & *non humorales*. Tumores humorales à fluidis oriuntur quibuscumque, & quidem vel extravasatis & collectis, vel in vasis contentis nimiumque cumulatis, vel partim extravasatis partim in vasis exuperantibus.

Exempla tumorum à fluidis tantum extravasatis & collectis præbent Ascites, Hydrocephalus, Hydrocele, Abscessus quivis, spurium Aneurisma, contusiones quædam insignes; à fluidis in vasis magnis contentis Aneurisma legitimum, Varices, Hydatides; à fluidis in vasis minimis, tumores quàm placidi inflammatorii, Skirrofi, Serosi, Oedematosi; postremo à fluidis extravasatis partim, partimque in vasculis cohibitis exempla quoque desumimus è tumoribus jamjam nominatis.

Tumores non humorales, à solidis partibus loco dimotis procedunt, & quidem vel quatenus eæ in alias cedentes ac propulsas decumbunt, ut in Herniis non humoralibus, membris luxatis, fracturis quibusdam videre est; vel quatenus ipsæmet situm mutavere ac erumpunt tumidæ, ut ostendunt Staphilomata quædam, & nonnullæ ani, vaginæ, uteri Procidentiæ, calesque similes.

V. Tumores à fluidis frequentius suscitantur & quidem per vasa minima cohibitis. Hæc enim viribus vitæ trusilibus continuo suppeditata, cum libere alicubi non fluunt (quod in vasis minimis sæpius evenit) vascula partis magis & magis ita inflant, ut tandem pars ipsa in tumorem eversa conspiciatur. In id autem negotii breve tempus interdum infumitur, interdum, ut moles partis augeat in tumorem, tempus sat protrahitur. Cum modo priori excitantur tumores, per *Fluxionem*, cum posteriori, per *Congestionem* fieri à Chirurgis dici solent. Verum si motus mechanicos, quibus tumores sive citò sive lentè procreantur, spectemus, *Fluxionis* & *Congestionis* nomina hæc, quibus tumorum productionis modi distinguuntur, ex falsâ sanè Antiquorum Theoriâ proflua, nec nisi errores eorum in explicandis tumorum generationibus his temporibus menti obicientia è sermonibus chirurgicis proseribemus. Causæ excitationis tumorum humoralium essentialiter binæ sunt, motus trusilis vitalis, hoc est motus cordis & vasorum fluida parti suppeditantium, ac impedimentum fluxui libero in vasis partis, quæ tumescit. Sive brevi sive lentè fiat tumor perinde est, hæc duæ causæ semper desiderantur; Quas verò ob causas tumores humorales interdum citò, interdum lentè progenerentur, in sequentibus ostendetur.

VI. Cum igitur toties excitetur tumor, quoties adfluentes liquores per

vasa satis liberè non meant, in corpore autem viventi fluida assiduò trundantur, respiciendum præprimis ad causas, quæ impedimentum illud procreant. Ex autem vel sunt ipsa fluidorum vitia, vel vasorum, vel sunt res eis externæ. Vitia fluidorum, quibus tumorum excitationi locus præbetur, nimis sunt eorum quantitas aut rareficientia, quæ quidem vitia sub titulo *Plethoræ* veræ & falsæ comprehenduntur; sunt & ipsorum spissitudo nimia, viscositas, acrimonia, particularum prava mixtura, adeò ut hîc fluida nimis crassæ hîc occurrant, quæ cuncta vitia ad *Cacochymiam* referuntur. Vascularum vitia sunt inprimis nimia eorum laxitas, tensio, durities, crassities in parietibus. Res externæ ductibus, fluidorum transfluxum liberum in eis prohibentes ea sunt quæ eos stimulant, quæ distrahunt, frequentius autem præcipuè, quæ eos comprimunt, ut ossa loco dimota, ossium frusta, lapilli, tumores priùs producti, ligaturæ, corpora varia in humanum corpus immissa, intrusa, ut globi plumbei, lapides, turundæ imperitè impactæ, & similia.

VII. Causæ tumorum remotiores sunt aër, cibis potusque, motus & quies, somnus & vigilia, excreta & retenta, animique pathemata; quæ causæ *Necessariae* ac *sex res non naturales* dici consueverunt. Sunt & aliæ causæ fortuitæ, ut ictus inflicti, morsus animalium venenatorum, casus, & similes quarum quidem causarum universalium in excitandis tumoribus agendi modi esse semper collimant, ut liberum per vasa liquorum fluxum, aut eos modis jam traditis vitiando, aut vasa labefactando, aut etiam illa comprimendo, præpediant.

VIII. Tumorum humoralium differentia ex variis respectibus quamplurimu statuuntur, sic ratione fluidi ex quo suscitantur tumores, alii *Sanguinei* aut dicuntur, quos inter frequentiores & insigniores *Inflammatorii*, alii nuncupantur *Lymphatici*, alii *Serosi*, alii *Adiposi*, alii *Flatulenti*, & sic porro.

Cùm quatuor præcipuos Prisci admitterent humores, & ab eorum unoquoque tumorem specialem excitari posse assererent, quatuor & quoque statuebant tumores præcipuos, Phlegmonem, quam à sanguine, Erysipelam quod à bile, Oedema, quod à pituita, & Skirrurum, quem à melancholia oriri dixerunt. Verùm cùm Theoria hæc prorsus falsa sit, ideò & hinc præfluens tumorum divisio nullius habenda momenti. Illud tantum animadvertendum insigniores præ cæteris existere quatuor nominatos tumores, & quorum naturam quamplures alii sapiant; quippè quod *Phlegmone* ac *Erysipelas* tumores sint sanguinei & inflammatorii, *Oedema* autem & *Skirrurus* inter *Lymphaticos* præcipui.

Jam verò caliditatis & frigiditatis ratione, alii tumores *calidi* vocantur alii *frigidi*; calidi sunt à sanguine, suntque semper inflammatorii, frigidi ab humore lymphatico præprimis. Ratione extensionis alii dantur tumores *magni*, alii *mediocres*, qui cùm ratione molis valdè prominent *Phymæ* vocantur ac *Tubercula*, alii exigui, qui *Exitura* & *Exanthemata* antiqui nuncupati fuere. Ratione substantiæ alii sunt *Duri*, alii *Molles*, alii *Remi-*

es. Ex colore; conspiciuntur *albi*, *rubri*, *nigri*, *lividi*, *flavescentes*, *partim oncolores*. Ratione sensibilitatis, alii *dolentes*, alii *indolentes* existunt. Ratione partium affectarum, alii *externi* sunt, alii *interni*, ut & alii *ossei*, alii *partium mollium*. At tumores quatenus morborum effectus sunt, alii nominantur *Symptomatici* cum ex eorum genesi morbus nihilòsecius sævit aut tiam exasperatur, *Critici* verò alii cum ab eorum ortu symptomata morbi principis sedantur. Et ità deinceps ex variis respectibus plures aliæ occurrunt morum humoralium differentiæ, sed accidentales.

IX. Symptomata Tumorum quod spectat, ea pro naturâ eorum diversa multiplicia adeò ac varia sunt, ut nisi ex accuratâ singulorum Historiâ disci haud possint. In genere tamen certum est dolorem, ruborem, & calorem, Tumorum inflammatoriorum individuos esse comites, febrem autem sæpè iis adesse; Tumores autem simpliciter Lymphaticos doloris & caloris insignis esse expertes, nec nisi cum inflammatio accesserit eos incandescere ac dolere. Sed ut ex variâ Tumorum naturâ Symptomata enascuntur diversa, ità & partium affectarum ratione, ut ut ejusdem indolis tumor illas occupet, Symptomata alia & alia oriuntur, quod sanè cognitio partium affectarum structurâ usibusque diversis perspicuum fit, sic inflammatio faucium deglutitionem, pulmonum respirationem, renum & vesicæ miccionem difficilem efficit. Postremò notandum symptomatis tumorem eundem variis slipari, prout morbi quatuor percurruntur tempora, alia enim in principio, alia in augmento, alia in statu, in declinatione alia manifestantur.

X. Diversimodè peragitur tumorum humoralium exitus, *Resolutione* nimirum, aut *Suppuratione*, aut *Induratione*, aut *Mortificatione*. Per *Resolutionem* sive *Dissipationem* terminatur tumor cum moles ejus sensim discutitur, & ad limites naturales pars illibata reducitur; quod potissimum fit, cum integra servantur vascula, eaque motum pristinum liquores autem naturalem recuperant fluiditatem; Per *Suppurationem*, cum ruptis nonnullis vasculis fluidisque partim in pus conversis tumor abit in abcessum; Per *Indurationem*, cum humoribus in vasis cohibitis fluiditate exutis, pars immens amisso ferè sensu indurefcit. Per *Mortificationem* tandem terminatur tumor, quando plurimum fractis vasculorum viribus fluida congesta, vix aut nullatenus in parte moventur, alia autem continuo vi sufficienti in eam propelluntur in fluxu deinceps per illam cohibentur, adeò ut vires vitales hoc est vasculorum pulsio, fluidorumque progressus in parte determinatâ opprimantur; quæ vires si penitus in eâ perierint, vasculisque disruptis fluida effusa confusim cum vasculorum fistulis commixta fuerint, tunc *Necrôsis* seu mors absoluta partis adest, qui status *Phacelus* & *Syderatio* dicitur; at si oppressis dumtaxat his viribus vitæ reaneat scintilla, vasculis nimirum adhuc manentibus integris & aliquantulum motitatis, trusisque lentè per ea fluidis, vel saltem pluribus licèt ruptis, aliquibus saltem manentibus integris languidè motitatis, tunc *Gangraena* constituitur. Tumores, tum sanguinei, cum lymphatici per resolutionem

Interdum terminantur. Qui in suppuratos abeunt inflammatorii fuere semper. Lymphatici inflammatorii sæpius indurantur. Qui mortificatione terminantur, inflammatorii fuerunt sæpius.

XI. Antequam signa diagnostica, prognostica, tum & curationem generalem tumorum afferamus, Lectorem monitum volumus, nos de tumoribus externis, quique in aperto sunt scribere decrevisse, ut hinc opus exurgat Medico-Chirurgicum. Quocirca nihil de tumoribus internis, nisi quantum materiæ exiget affinitas, attingemus.

XII. Tumores tactu visuque percipiuntur, eminent enim omnes partemque ultra solitos naturæ limites ferunt, variè tamen ex eis functiones laeduntur. Inflammatoriorum signa essentialia sunt rubor, calor, tensio & dolor, quorum sæpissimè febris comes fit; lymphaticorum, color partis aut non mutatus aut albicans, doloris & caloris aucti absentia, sæpe frigiditas, interdum mollities, interdum durities. Cæterorum signa in propriis capitibus assignanda erunt. Quomodo autem dignoscantur causæ tumorum, in speciali eorum historiâ declarabitur.

XIII. Tumorum prognôsis varia statuenda est pro eorum naturâ, extensione, parte affectâ, causâ producente, terminationis modo. Ita 1°. Tumores inflammatorii sæpe periculosi sunt & inter morbos acutos ut plurimum recensendi; tumores Lymphatici graves frequenter, curatu difficiles, ac morborum chronicorum indolem sæpe sapiunt. 2°. Prout tumor ut ut ejusdem indolis magis aut minus erit extensus, hoc est majorem aut minorem corporis portionem occupabit, graviores aut minus gravem morbum judicandum fore evidens est. 3°. Partium affectarum respectu, tumores pro variis earum usibus magis aut minus periculosi, molesti, curatu difficiles, aut è contrâ nullatenus periculosi. nec molestiam procreantes, & faciles curatu. Tumores profundi in genere exterioribus molestiores, & curatu magis difficiles. 4°. Ratione causæ, cum vitium in fluidis, undè tumor ortum duxit, foveturque, facile emendatu, aut ex adverso cum à causa gravi aut lue aliquâ fluida vitata sunt, ut à causa Malignâ, Pestilentiali, aut à viru quopiam, Venereo, Strumoso, Scorbutico, prognôsim tum quoad periculum tum quoad curationis facilitatem, aut difficultatem variam instituendam fore perspicuum fit. Similiter symptomaticus tumor critico periculosior; prior enim vitium in fluidis semper subsistens & con umax, posterior vitium in massâ universali aut imminutum, aut etiam deletum & in vasis partis tumidæ reductum denotat, quare is tumor salutaris, ille periculo plenus quin & sæpe lethalis judicandus. 5°. Ratione exitus tumoris, prognôsis & quoque varia exurgit, sic resolutio optabilior erit, magisque salutaris tumoris exitus (si quosdam excipias tumorum critico- rum casus, in quibus materiæ morbificæ tumoris externi in massam fluidorum universalem metquenda remixtio) ægro enim non procreatur, cum discutitur tumor, molestia, parsque sanatur incolumis. Cum autem suppuratur tumor, non desunt molestiæ, quibus æger interdum cruciatur, æ

velut in novum morbum incidit; deinceps pus confectum si retineatur fluidisque remisceatur, mala plurima excitare valet; postmodum pars aperienda sæpè & quidem ferro aut corrosivo medicamine, hinc ulcus curandum, sæpèque fœda, & fugienda, ut in oculis, facie, collo, succedit cicatrix; quas omnes ob causas plurima ex suppuratione ægro sæpè præfagienda mala; interdum tamen, ut in criticis tumoribus, optanda suppuratio, quò materia tumoris extrà circulationis vias acta fluida vitalia amplius non inficiat, quamobrem ex suppuratione salus ægro nonnumquam præfagitur. Cùm tumor induratur sanatio integra præfagienda difficilis, ægrè enim discutiantur fluidorum particule, quæ concreverint; præterea ex induratione in pravam indolem nimirum cancerosam tumor nè abeat interdum periculum est. Postremò pessimè ominandum de tumore, qui ad mortificationem tendit, nihil enim parti magis timendum quam vitæ privatio, quæ etiam corpus universum in ruinam trahere potest.

Sic autem præcognoscuntur futuri tumorum exitus. 1º. Si remittentibus symptomatis febrigue, si adfuerit, pruritus in parte excitetur, calor tendat ad naturalem, sensim pars detumescat, leviorque ægro videatur, tùm si topicis applicatis ut emplastris cataplasmatis velut mador inspersus conspiciatur, resolutione tumorem fore discutiendum signum est. 2º. In suppuratum verti tumorem ostendunt tensionis doloris & caloris augmentum, pulsationis sensus, febris vigescens; peractum autem pus significant remissio symptomatum, molestiæ partis cessatio adeò ut gravamen, ut antea, in hac non persentiat, pars fiat mollis, tangentique appareat fluctuatio, tumor tunc in abscessum abiit, qui cùm sæpè mucrone fastigietur mollietiem adhuc majorem hinc exhibet. 3º. Indurationem imminere indicant imminutio tumoris, doloris si adfuerit remissio, renitentia interim major succedens, & præprimis cùm præcesserunt repellentium aut resolventium applicationes præposteræ. 4º. Mortificationem portendunt caloris naturalis in parte imminutio summa, dejectio virium, anxietates universales subito excitatæ, vigiliæ, paulò ante fuscitati dolores vehementissimi, lancinantes, aut ustionis sensus, quibus mox succedit sensus partis obrusus, febris magna præcedens, quæ protinùs abit in pulsum debilem & inæqualem, color postremò tumoris vergens ad lividum, aut ad fœdè albicantem. Ex his ergo gangrænam prænuntiamus, quâ facta livefcit pars, frigeſcit, sensu fermè destituta est, interdum aliquantùm fœter, tùm si sensus penitus perierit ut & calor, parsque nigra fiat aut summè livida, quin & plurimùm fœteat, tùm in putrilaginem aut in *Escharam* duram vertatur, de vitâ partis tunc conclamatum est, adest enim *Sphacelus*.

XIV. Tumorum curatio variis sanè modis perficitur; alio enim curantur modo tumores non humorales, alio humorales & inter hos aliâ ratione inflammatorii, aliâ lymphatici frigidi. Similiter remedia diversimodè adhibebis prout tumor variam afficit corporis partem, pro indole causæ, unde produciatur, variâ, ut & prout ad aliquam tendit & quatuor mutationibus

memoratis; postremò ad varios tumoris status, qui diversis morbi temporibus observantur, in curâ prospiciendum; diversimodè enim curandus tumor prout in principio fuerit, aut in augmento, aut in statu, aut in declinatione, remedia enim quæ certo tempore congrua extitere sæpè alio mutanda.

Tumores non humores curantur, 1^o. Restitutione partis in situm debitum, quæ operatio *Taxis* vocatur. 2^o. Partem reductam in situ continendo, causasque dimoventes auferendo. 3^o. Item per *Apharesim*.

Tumores autem humores universaliter curantur liberum per vasa fluidorum transitum procurando. Quod fiet fluidorum quantitatem, cum exuperans extiterit, imminuendo, pravas eorum qualitates emendando, causas removendo externas, à quibus vasa aut stimulantur, aut comprimuntur, aliove modo labefactantur, tum & vasis tonum debitum restituendo. Quæ ob causas congruens principiò præcipietur diæta, quæ varia sanè cum variis in casibus requiratur, hic genericè determinari nequit. Sed & plura alia à Chirurgiâ Pharmaciâque desumpta afferentur auxilia. Ita si fluidorum copia imminuenda sit, illud missione sanguinis in tumoribus inflammatoriis præsertim protinùs præstabitur; at in lymphaticis ac serosis cathartica valida, diuretica calida, nec non sudorifica evacuationibus procuratis hanc indicationem adimplebunt. Insimul fluidorum vitia corrigentur primò cathartici aut vomitoriis, causam, quæ sæpenumerò morbum fovet, feliciter evacuantibus, fluidaque ad majorem mobilitatem incitantibus; tum deinceps medicamentis alterantibus pro re nata è variis classibus depromptis. Itaque cum fluida crassa fuerint spissa, viscosa, aperientia præscribes, diuretica calida, diaphoretica, aliave attenuantia; quin etiam nonnulla specifica adhibenda erunt, ut mercurialia, antiscorbutica, si crassum in fluidis venereum extiterit aut scorbuticum. At cum fluida seroso vehiculo defecerint, tunc diluentia, humectantia, eaque attenuantibus nonnumquam intermixta proficua erunt. Cum autem fluida acria nimium fuerint, mobilia, ad rarefactionem proclivia, tunc indicabuntur anodyna, edulcorantia, refrigerantia aquea, refrigerantia acida, oleosa dulcia ac similia pro variis circumstantiis variè seligenda. Emendando autem fluidorum tum ratione quantitatis tum ratione qualitatis vitia, vasorum tunicæ ad debitum tonum unà revocabuntur.

Nec tantum medicaminibus internè sumptis tumoribus opitulamur; indigemus sæpissimè externis quæ applicata, loco vitato imprimis congruas alterationes imprimant, unde *Topica* hoc est localia apud Medico-chirurgos audiunt. Interdum ergo attenuantia applicanda erunt tumori cum nimirum crassities ac segnities fluidis, vasis autem inertia adfuerint; interdum relaxantia, emollientia similiave anodyna cum fluida æstuant, vasa autem plurimum tensa sunt, vibrant ultra modum, partemque dolor occupat, quin & fluidorum motus in parte tumente refrigerantibus repêrcussivis interdum frænandus erit; nonnumquam fractum vasorum elater astringentibus topicis erit restituendum; tum etiam interdum irritis medicaminibus,

stringentibus fasciis aliâve deligatione vasa ab impetu aut gravamine fluidorum erunt manienda.

Circâ topicorum applicationem notabitur, formam eorum in variis circumstantiis diversimodè præcipiendam; eæ formæ potiores sunt, emplastri, cataplasmati, linimenti, lotionis, pulveris. Notandum & quoque cum variè mutantur tumores, topicorum electione justâ iis esse opitulandum, hoc est juvandos esse Medici artificio fluidorum vasorumque motus mechanicos cum ad sanitatem tendunt, corrigendos autem cum in perniciem abeunt. Quare cum ad resolutionem optatam tendit tumor, ei applicanda erunt topica resolventia & quidem varii gradûs, quibus interdum emollientia levia socianda erunt. Cum autem non optabitur resolutio, ut in quibusdam tumoribus criticis, tunc vehementia attenuantia, emplastica, imò & vesicantia, quæ fluidis & vasculis agitationem magnam procurent, ingurgitationem adaugeant, & vasa ad ruptionem proximam disponant, erunt applicanda. Imò si periculum sit in morâ, ad corrosiva erit confugiendum aut etiam ad ferrum ignemque, timeretur si quidem in hujusmodi casibus fluidorum tumoris in vias circulationis transitus. Ad suppurationem vergente tumore, quæ *maturantia* & *suppurantia* vocantur protinùs erunt imponenda, factò hinc abcessu, si non rumpatur ut par est, is erit lanceolâ aut scalpello aut corrosivo medicamine aperiendus, quantum fieri poterit, in parte molliori, declivi, magis prominente, vasa insignia, nervos, tendines, ac ligamenta devitando; pure postmodum, si abcessus exiguus extiterit, unâ vice, aut pluribus, si magnus, evacuato, curatio reliqua ut ulcerum perficietur. At cum induratur vitiosè & cum malis ægri rebus tumor, succurreret protinùs emollientibus, quin & suppurantibus validis, melius enim sæpè tumorem auferri per abcessum quàm indurari nulla curationis facilis spe superstite. Verùm ad mortificationem vergenti tumori protinùs auxilium ferendam, topicis scilicet spirituosiss. resolventibus, salinis attenuantibus & stimulantibus, ac similibus. His autem irritis cum mortificatio successerit, tunc gangrenæ aut sphaceli, prout inferiùs docebitur, cura instituitur.

Sicut autem in applicatione topicorum tumorum mutationibus sic & ipsorum temporibus attendendum. Quædam enim topica, quæ tempore opportuno salutis fuissent, alio perniciofa sunt; ita repellentia tumoribus inflammatoriis initio sæpè proficua, in augmento ac præprimis in statu exitiosa sunt. Resolventia in augmento molesta admodum, in statu ac declinatione magis accommodata, suppurantia in statu quam aliis temporibus feliciora.

Nec in medicaminum topicorum applicatione negligenda partium affectuum indoles, sunt enim aliæ teneri textûs ac sensûs exquisiti, aliæ verdè densi parùmque sensibiles, quâ quippè ratione topicum his parum efficax, illis validum erit, ità ad oculos levia in topicorum classibus seliguntur. Præterea partes aliæ succis alluuntur lentè progredientibus, aliæ vividius actis, quam ob causam topica & quoque eligenda erunt eis congrua. Et sic porro

cæteris partium constitutionibus variis erit attendendum.

Cautiones universales circa topicorum delectum satis attulimus, at non minus in medicaminum internorum præscriptione variis circumstantiis, ut artificiosè procedat tumorum curatio, erit advertendum. Verùm hæc omnia in speciali eorum historiâ manifestiora fient, circa tumorum universalia satis jam sermo productus est. Et sanè rationi ordinique doctrinæ consentaneum erit, si in tradendâ speciali eâ historiâ à tumoribus inflammatoriis ordiar, utpotè qui sanguinis circuitui directè adversantur, simulque frequentiores sunt ac sæpius funesti; statimque inflammationem ipsam, velut genus quoddam tumores quosque inflammatorios ceu species suas complectens, pertractem.

CAPUT SECUNDUM

De Phlegmone genericè sumptâ, seu Inflammationis Historia.

XV. **P**hlegmone sic à sanguine fortè dicta, unde fit, qui quidem non modo *Aima*, sed etiam *Phlegmos* (a) à Græcis dicitur, vel potius à verbo Græco *Phlegmaino* (b) suam etymon ducens, sumitur genericè pro inflammatione quâvis, speciatim autem pro tumore inflammatorio, de quo postea agemus.

XVI. Inflammatio in genere *Tumor est calidus, cum tensione, rubore ac dolore*. Tumorem hunc à sanguine produci ostendunt rubedo calorque intensior, partes enim tantùm à sanguine rubent, nec nisi ubi is præsens est sensibiliter calent. Quare causam ejus continentem agnoscimus sanguinem in parte quâcumque exuperanti copiâ præsentem, simulque in suis particulis vehementiùs commotum. Quæ causa suscitabitur quoties sanguis subitò per vasa minima difficilè fluat, vigebunt interea ac intendentur motus cordis & arteriarum.

XVII. Quænam autem sunt vasa hæc minima quæ sanguis in partibus inflammatis difficilè permeat? Ea esse tantùm sanguifera plures credidere, quæ quidem sanguine quibusdam salibus heterogeneis extricatis, & plurimùm inter se, ut inquirunt, *Colluctantibus* facto inde effervescente turgida repræsentant.

Nos antequàm fluidorum vasorumque partem inflammata constituerent statum determinemus, inflammationis naturam ab Auctoribus, qui de re,

(a) Vid. *Hesychius, Budaus, Tusanus*.

(b) *Thema, Phlego (uro) Schrevelinus*.

chirurgicâ scripserunt parùm perspectam adeòque obscurè nimis expositam fuisse animadvertemus, quousquè nimirùm sanguinem rubrum in vasa lymphatica interdùm deviare compertum fuit, & ab illustrissimo Viro Domino *Helvetius* Reginæ Archiatro nitidiùs demonstratum. Cujus quidem inventi gloria licet ab eis, qui Auctorum opera parùm perlustrant, in Clarissimum *Boerhaave* referatur, eam tamen Doctori Monspeliensi Clarissimo Domino *Vieussens* æquius deberi ostendit Editio ejus *novi Systematis vasorum* Boerhaavii Operibus anterior, in quo quidem statum partis inflammatae adamussim repræsentat Medicus ille Monspeliensis de rebus Anatomicis potissimum bene meritus; quamobrem locum ex prælaudato Libro excerptum de inflammatione intestinorum deinceps transcribendum judicavi.

XVIII. Jam verò si vasa, in quibus sanguini per vitium progenitum immutato ad difficilè transeundum major propensio est, sedulo inquirantur, arteriolæ minimæ menti protinùs se offerunt; nullibi enim magis in viis sanguinis ad transitum fluidi difficilem conditiones ex parte vasorum ac in eis inveniuntur, ubi nimirùm in continuas venulas continuæque vasa lymphatica aliave secretoria defituræ sunt; ibi enim viâ sanguini summè stricta est, ibique coni arteriosi velut apex reperitur; idcirco molecula tantisper crassior suæque divisioni nimis resistens, quæ tamen hucusquè devoluta est (quod ipsius diameter arteriolæ tractûs, quem pertransiit, diametrum nondùm superaret) in arteriolæ extremo facilè hærebit, quod ejus diametrum tunc superet ut pote accedentem ad minimam, eoque tenaciùs adigetur, quo ob figuram conicam vi sanguinis succedentis ad minorem semper diametrum protrudetur. Accedit, quod licet molecula crassior ac arteriæ minimæ diametrum non superans nulla devolvatur, si tamen casu moleculæ plures ad transeundum per strictam hanc viam simul sese obtulerint, arteriolæ minimæ diametrum simul sumptæ superabunt sæpiùs, quàm in antecedente tractu arterioso utpote patentiori, in quo proindè numerus major particularum simul se offerentium desideratur, quæ fors rarior est. Cùm itaque res ita continget, fluxui sibi mutuò obstabunt, ac fornicem velut interdùm compingent vi accedentis sanguinis difficilè destruendam, quod pars anterior strictior sit posteriore succedentis sanguinis ictibus exposita.

XIX. Licet autem in venulis moleculæ sanguinis crassiores, si quæ superatis arteriolarum sinibus productæ fuerint, obturaculorum vices absolutè agere queant, certum tamen est id infrequentiùs eventurum, quòd venulæ arterioliis, quibus continuæ sunt, patentiores sint, quodque in eorum ad basim vergentem aut saltem in ramos cylindricos majoris & majoris diametri continuò abeant.

Et si autem venulæ ab infarctu ex vitio fluidi arterioliis magis immunes existant, fatendum tamen, cùm fluidis benè se habentibus à compressione dumtaxat inflammationes producuntur, sanguinis cursum in exiguis venulis perindè ac in arterioliis sistendum fore, quod exigua quæque vascula vim comprimentem ferè æqualiter experiantur.

XX. Cùm igitur conditiones ad transitum difficilem ex vitio fluidi (ex vitiatas autem fluidis frequentius quàm ex aliis causis oriuntur inflammationes) nullibi magis quàm in arterioliis reperiamus, in eis potissimum ac primario inflammationis causam materialem residere inferemus. Nec tamen in eis solis causa hæc subsistit, sunt & alia vascula in quæ deinceps sanguis deviavit, & in quibus ægrè protruditur, cùm inflammatio absoluta est. Vascula hæc exigui sunt ductus lymphatici arterioliis minimis continui, qui *Arteriolarum lymphaticarum* nomine à Recentibus Anatomicis designari solent, ductus arterioliis sanguineis ubique comites, ductus è quorum texto alba partium substantia potissimum constat. Sanguinem autem, cùm partes inflammationem absolutam patiuntur, in hæc abiisse evincitur, 1^o. Quod in arteriola extremâ eum in fluxu suo cohibitum & à sanguine succedente compressum, simulque in suis minimis particulis succussiones summas patientem concipere non licet, quin simul ostiolorum lymphaticorum dilatationes insuetas, globulorum attritiones ac impulsiones validas, ex hisque causis globulorum rubrorum in arterias lymphaticas ingressum admittamus. 2^o. Quod partis inflammatae, quæ prius albicabat, rubor intensus, ubique diffusus ac permanens sanguinis præsentium in lymphaticis apertè demonstrat, dilatio enim sanguinis ductuum paucorum ita diffundi non potest, ut partis albicantis superficies in rubram ubique mutetur. Cujus quidem casus exemplum elegans sanè præbet Ophthalmia, in quâ quidem Adnata adeò interdum rubore persusa est, ut impossibile sit absquè globulorum rubrorum in vasa ejus alba ingressu concipere, quâ anterior oculi superficies ex candicante in rubram penitus abierit, imprimis si attendamus in eâ parte vix adesse vasa sanguinea, eam autem vasis albis lymphaticis quasi totam textam esse. 3^o. Quod partium inflammatarum etiam post obitum inspectio illud perspicuè nos doceat. Quâ de causâ Clarissimum audiamus Anatomicum hujusque Universitatis Doctorem, D. Vieussens in novo vasorum Systemate p. 109. ita loquentem. *Ager nuperrimè Monspelienſe ingressus est Nosocomium, quem intestinorum inflammatio paucos intrâ dies sustulit. Aperto postridiè obitûs illius cadavere, intestina, ac præsertim ileum & colon, magnâ inflammatione, quam præternaturalis illorum tumor & rubor indicabant, affici comperi. Quò efficientem, ut & formalim hujusce inflammationis, atque adeo cujusvis alius, causam dignoscerem, si fieri posset, partem coli duodecim circiter transversorum digitorum longam quam major occupabat inflammatio, à reliquis intestinis separavi; eas quas continebat, graveolentes fæces vacuavi, frigidâ cavitate illius abluvi; & unâ extremitate filo arctissimè ligatâ tubulum alteri applicui, quo intermedio hocce intestinum flatu, quantum potui, distendi & postmodum in aëre suspendi. Uno aut altero elapso die id ipsum intestinum sic paratum, & nequaquam adhuc corruptum in loco cui sol multum collucebat diligentissimè examinavi. Cùm primum illud perspicere cepi; Textura ejus maximâ mihi admiratione digna visa fuit. Arteria ve-*

neque illius unā cum omnibus propaginibus suis nimia ; quam ad miserant ; copiā rubri liquoris vivifici , cui vehendo dicata sunt , supra modum turgabant ; proptereaque ductuum lymphaticorum inhiantium cavitatibus ostiola ita dilatata fuerant , ut non solum lymphatico sucor , qui continuo è massa sanguinea secernitur , sed & ipsi sanguini aditum prabuerint , qui , cum suam ob crassitiem in venas facile refundi nequiret in hisce vasis fistebatur. Hinc factum ut è parietibus jamjam memoratorum vasorum indefinitos ductus rubros , veluti sanguiferos totidem rivulos flexuosos , proficisci dixisses , qui mirum in modum simul impliciti , innumeris in locis coeuntes , & in venas confluentes unā cum vitalibus viis unum quid visu jucundissimum , maximeque mirandum constituebant. Ex hac observatione sequitur evidentissime sanguinem , dum eo , utpote nimis copioso aut nimis rarefacto , redundant arterie , nonnumquam in cavitates ductuum lymphaticorum novissime detectorum , plus nimio dilatatis ipsorum ostioliis , effundi , inibi sisti , adeo inflammationis speciem producere , cujus nitidam ideam ab eo solummodo tempore habere capi , quo secretoriorum humani corporis vasorum originem distributionem & insertionem detexi.

XXI. Quamquam allatae rationes sanguinis globulorum in lymphaticos partium inflammatarum ductus ingressum non modo evincant , quin imò demonstrent ; similem globulorum deviationem sequentibus exemplis confirmare juvat. Sic in menstruo fluxu muliebri globuli sanguinis rubri ab extremis arteriolis per dies aliquot in uteri , aut etiam quoque in vaginæ ductus , qui per reliquum mensem lymphatico-serosum liquorem tantummodo transvehunt , derivantur ; prout in Dissertatione de Generatione , & Conspectu partium corporis humani solidarum , edoctum fuit ; ab eisque nullo soluto continuo unā cum sero sanguineo commixti in uteri & vaginæ cavum cruoris specie eructantur , quandiū nimirum urget plethora , subsistitque vasorum uteri ac vaginæ dilatatio. Sic menstruatim sanguinem per mammarum papillas ab ostioliis extillasse , hoc est per ductus mammarum lymphatico-lacteos globulos rubros cum sero , illasā mammae substantiā , transmeasse , haud semel observatum. Sic in fluxu hepatico globuli rubri sero diluti per intestinales ductus excretorios relaxatione nimium apertos in cavum intestinorum depluunt. Sic sanè tinguntur sæpè sputa cruore , cujus globuli per ductus humoris bronchialis in Peripneumoniā dilatatos , irreperunt. Sic nonnulli sudore sanguineo maduere , globuli nimirum rubri per dilatatos perspirationis ductus unā cum sero eruperunt. Sic in variolis , qui lethalis contingit interdum mictus cruentus , globulos sanguinis rubros nimium divisos pulsofque per vasa renum urinosa transmeasse , sanè significat. Sic tandem maculis rubris cutem debonestatam interdum conspiciamus , quatenus globuli sanguinis in quævis cutis vascula extramodum dilapsi ruborem particulæ cutis puncto cuivis visibili imperciunt.

XXII. His citcā inflammatae partis constitutionem in universum pate-

factis, si quâvis de causa sanguinem per arterias extremas ægrè progredi subito contigerit, vigeant interim vires cordis & arteriarum trulivæ; sanguis cum assiduò ad vasa minima feratur, nec eadem tunc, quâ appellit copiâ in continuas abeat venulas, eum in arteriis extremis cumulandum fore consequitur. Quamobrem ex solito magis tenduntur, undè vibrabuntur in sanguinem contentum citiùs vehementiùsque; sanguinis ergò meculæ ultra modum succutientur, quæ quidem secundùm axim ductûs faciliè non fluentes validiùs solito in arteriæ parietes ab eo dimovebuntur ac reagent; quare ex his attritus ingens inter vasculorum parietes contentique sanguinis particulas, adeòque causa ignis & caloris intensior, hinc succussio vehementior solito in minimis arteriolarum fibrillis, vicinis partibus membranæ-nerveis etiam communicata, undè adaucti in parte caloris sensus.

Sed & contind magis ac magis congestus in arteriis sanguis parietes earum magis & magis ab axe ductûs removebit, tantò magis quò ab impetentibus solito vehementiùs, ut dictum est, in earum latera sanguinis particulis, dimotio talis adhucdum augeatur; dilatabuntur ergò plurimùm arteriolaræ; viribus eisdem lymphaticarum arteriolarum ostiola nimis aperientur, tensaque servabuntur aperta, & in ea irruent magis divulsæ & ab axe ductûs potentiùs dimotæ globulosæ partes rubræ ac fib os nonnullæ, quæ priùs in sanitatis statu, ob ostiolorum lymphaticorum angustiam arteriolas lymphaticas non subibant, nec nisi per ductus sanguineos utpotè patentiores devolvebantur. Hæ autem partes jam devix per arterias lymphaticas ob earum angustiam vimque minorem trulilem ægrè meabunt, hinc & harumce ingurgitatio ac dilatatio nimia. Dilatatis ita prætermòdum & obstipatis arteriis & sanguineis & lymphaticis moles partis augefcet ac tensio, fiet tumorensus, & quidem ruber, quod dilatatæ plurimùm & quidem agitato ac rutilante sanguine arteriæ ruborem intensiorem in parte diffundant, tum & quòd in lymphaticis præsens insolitò sanguis colorem rutilum albicantibus antea partis affectæ punctis impertiat.

At partis tumentis dolor à mole congesti pulsique in memoratis ductibus sanguinis, tunicas eorum ultra modum tendentis ac impellentis, fibrasque nerveas partis texti vehementer proindè divellentis oritur.

XXIII. Dùm sanguis in inflammata parte per arteriolas extremas difficile fluit, non existimandum peræquè cunctas eo infarctas esse. Aliæ siquidem vel quòd arctiores, vel quòd minùs robustæ, vel quòd magis compressæ, vel quòd sorte particulas sanguinis crassiores susceperint, plurimùm infarctæ sunt, indicium est tumor partis, tum & sanguinoductuum nonnullorum succedens interdum crepatura, quæ ex hemorrhagiâ aut etiam suppuratione nonnumquam succedentibus evincitur; Arteriolaræ verò aliæ minùs plenæ sunt, indicium est vita partis. Ex arteriis pariter lymphaticis aliæ magis minùs aliæ obstipatæ sunt, prout sanguinis globulos partesque fibrolas diversimodè admiserunt, universim tamen arteriis san-

guineis utpote arctiores minusque robustæ obstructionem magis tenacem experiuntur. Sanguis ergo, qui per sanitatem sub forma duplici rubri nimirum & serosi fluidi, ab arterioli sanguineis in venas confluit, partim nimirum per continuos sanguiductus partim per protractas ab arterioli, ad venulas ductus lymphaticos, jam in inflammata partis statu per certum arteriolarum sanguinearum majoremque adhuc lymphaticarum numerum à transitu libero arcetur. Cum interim cordis arteriarumque vires trufiles vigeant, quin etiam ex resistentiâ in memoratis arterioli sanguineis ac lymphaticis obstructis plurimumque tensis subortâ intendantur, sanguinem ad venas sanguineas per pauciores ac antea ductus exiguos protrudendum fore consequens est, protruditur autem, ut ostendit vita partis & tumor amplius non augescens in statu; quare fluenti celeritate com meatûs momentum compensari dumtaxat potest; crescit ergo celeritas transitûs sanguinis ad venas in parte inflammata, & quidem crescit in ea ratione, quâ crescit ratio amplitudinis totalis arteriarum inflammata parti liberè suppeditantium ad amplitudinem totalem ductuum minimorum in venas transvehentium, per decrementum nimirum quod ejus sit amplitudinis in parte inflammata. Verum ex illâ celeritate adauctâ in transitu per vasa minima crescit attritus & agitatio minimarum sanguinis particularum.

Crescit & aliam ob causam emissionis sanguinis celeritas è parte inflammata, quod nimirum tunc ferme totus sub fluidi rubri forma in venas transmittatur, vix autem sub forma lymphæ, ob obstructas globulis rubris aut partibus fibrosis spissioribus ferme cunctas arteriolas lymphaticas; eâ igitur de causa sanguinis arteriosi per partem inflammata trajecti & in venas immissi portionis celeritas in eâ ratione crescet, quâ sanguinis per vasa minima sanguinea projecti celeritas lymphæ per ductus exiguos fluentis celeritatem superat.

Jam verò ex adauctâ hoc duplici pacto sanguinis arteriosi in venas sanguineas immissionis celeritate febris excitatur. Eadem enim moles sanguinis per arterias liberas ad partem inflammata appellit ac prius dum sana erat ob remanentem intactam earum amplitudinem vigentesque ex hypothefi cordis & arteriarum vires, eadem autem reducitur moles, cum pars vitâ vivat, nec amplius factâ inflammatione intumescat; at celerius reducitur in venas, majorque simul moles fluidi transmeat, quod sedulo animadvertendum (ut jamjam probatum fuit) hinc celerior sanguinis cursus per venas magnas, frequentioresque proinde ad cor sanguinis sufficientis appulsus, cor ergo in dato tempore dilatatur pluries, ac pluries ad systolem stimulatur, contrahiturque, hinc pulsus frequentia.

Crescit interea in arteriis, venis, & corde sanguinis copia & moles, & eâ quidem quantitate quâ sanguinis arteriosi portio lymphatica à fluxu per arterias lymphaticas obstructas libero arcetur, hinc cor & arteriæ sanguine magis turgent, undè pulsus solito amplior.

Sed ex dilatatione hæc ulteriori tenduntur magis cor & arteriæ, ad con-

tractionem magis proritantur, hinc cordis arteriarumque vires trusivæ vehementiores, quibus quidem plurimum adaugetur motus progressivi ac intestini sanguinis momentum, undè pulsus frequentior adhuc, validior, magis plenus, hinc febris intenditur.

His etiam accedit ob inflammatae partis dolorem tensionem quamdam fibrillarum nervearum insolitam per universum corpus succedere, hinc mechanici cordis arteriarumque motus & ratione celeritatis & ratione vehementiæ intensiores, hinc febris causa ulterior ac augmentum.

XXIV. Cur verò sanguis in inflammationibus plerumque viscosus adeo ac tenax, ut in scutellis effusus factoque thrombo flavescente gelatinâ coopertus plerumque conspiciatur? Illud ab eo in arterioliis ingurgitatis validè pulsantibus compacto cum nonnullis haud repetas, pulsus enim is arteriolarum ut quivis alius ad fluidi molecularum divisionem tendit. Sique sanguis arteriolarum obstructarum viribus compactus in venas migraret, talemque gelatinam sanguini venoso conciliaret, ductus hi arteriosi liberi prorsus fierent, solutaque foret inflammatio; cur enim succedens sanguis fluxilior, adhuc non compactus, non transiret, cum compactus & spissior transisset ex hypothesi? Nec etiam calorem in parte inflammata reliquoque corpore accensum, utpote à quo absumatur serum aquosum relictâ fluidorum gelatina spissiori, ut causam hujusce viscositatis sanguinis adequatam haud habeas, eam enim, licet aliquid conferre queat, minimè tamen constitutionis hujus sanguinis inflammatorii, quæ in scutellis chirurgicis observatur, causam genuinam esse ostendunt plurimæ febres ardentes, in quibus æstus intensior est, nec tamen sanguis pellicula gelatinosâ in scutellis opertus conspicitur. Sed spissitudo sanguinis hæc in inflammationibus producta fuit. 1^o. A causa morbi, quæ sanguinem in principio ad inflammationem excitandam ut plurimum notabiliter inspissavit. 2^o. Ex eo quod sanguinis arteriosi parti inflammatae appellentis moles per arterias sanguineas ad venas ferè universa traducitur, vix autem sub forma lymphæ per lymphaticas, in quibus mucilago ejus præprimis attenuari consuevit. Quamobrem sanguis è parte inflammata in venas redux pluribus partibus mucilaginosus ac fibrosis crassioribus factus erit, quibus sanguinis moles viscosior crassiorque fiet, quibusque gelatina deinceps in coaguli superficie post sanguinis missionem in scutellis firma conficietur, globulis rubris ob levitatem supernatans.

XXV. Sed ut in inflammatis partibus obstruuntur arteriæ lymphaticæ; ita & in partibus *Secretionibus*, ut vulgò dicunt, dicatis, cum inflammatio eas invalerit, ductus secretorii obstitantur, susceptis nimirum in cavitate particulis seri gelatinosi sanguinei crassioribus & forsan interdum globulis aliquibus rubris, hisce vasculis exoticis, vi sanguinis in arterioliis obstructis vehementer ad latera pulsus adactis; qui casus in Peripneumoniâ frequentior ac vulgò credunt, cum nimirum sputa spissa cruore flavescente aut rubro diluto tincta sunt; namque tunc globuli sanguinis nonnulli lym-

pha bronchiali diluti ductus bronchiales secretorios sanè subiere. Succedunt autem ex obstructis ità subito ductibus secretoriis & sanè easdem ob rationes mechanicas, quæ in circuitu sanguinis ex obstructis subito arteriis lymphaticis supervenire ostendimus, sanguinis celerior in venas transitus, moles ejus adaucta in sanguiferis, reditus ad cor frequentior, plenitudo major vasorum sanguineorum, febris.

XXVI. Prout sanguinis per vasa minima ad transitum difficultas varia existit, triplex exurgit inflammationis gradus. Primus *Phlogôsim* exhibet, secundus *Inflammationem propriè dictam*, tertius *Inflammationem gangrænodem* constituit. In Phlogôsi quam Avicenna *Exarisionem* (a) nuncupat, pauca arteriola sanguineæ & leviter infarctæ sunt, nullæ lymphaticæ aut saltem pauciores, nullaque vasa secretoria aut duntaxat paucissima infarctum & quidem levem patiuntur; sanguinisque ad venas commeatus ferme per cuncta vascula fit, cum aliqua tamen molestia ob adauctum motum intestinum, adauctamque in vasis nonnullis ejus celeritatem; hinc pars rubea fit, calidior, dolens, in tumorem sensibilem vix aut parum elata, febrisque interdum adest, interdum abest.

In inflammatione propriè dictâ & absolutâ infarctus magnus est, & in sanguineis & in lymphaticis arteriis, cæterisve interdum ductibus exiguus. Vascula hæc minima plurimum tensa sunt, ad crepaturam proximè magnâ parte perducta, quin & interdum nonnulla crepuere; cæteri sanguis utut admodum molestè & per pauca vascula, transit tamen ad venas & cum celeritate insigni. Ex quibus in tali inflammationis gradu pars plurimum tumet ac tensa est, rubescit impensè ac dolet, ardere videtur, cruorem interdum eructat, febris ut plurimum excandescit.

Ex jam dictis consequitur inflammationis perfectæ duplicem dari speciem; prior ea est in quâ vasa cuncta integritatem servarunt utut infarcta quam plurimum ac tensa, eaque species peculiare nomen non obtinuit; posterior species ea est, in qua vasa nonnulla rupta sunt, sive à fluido nimium distendente crepuerint, sive à quacumque causâ externa disrupta fuerint, eaque species *Inflammatio systrophica* ab Antiquis dicta est, in qua igitur tumoris moles partim fluidis in vasis coercitis, partim fluidis extra vasa in substantiam partis dilapsis debetur.

In inflammatione gangrænode, vascula maximâ parte ad crepaturam infarctu adducta sunt, & inertia velut facta, interdum lacerata copiam notabili existunt, vixque per vascula nonnulla sanguis ad venas meat, unde tumor partis sæpe insignis, color ejus atro-rubeus, calor interdum acer interdum valde imminutus, color similiter interdum quasi urens interdum vix ullus, pulsus parvus, inæqualis, debilis, tremulus, anxietates cum debilitate virium. At hæc fusiùs deinde pertractabuntur.

XXVII. Licet febrem inflammatio sæpe comitem habeat eâ tamen sem-

per stipata non est; potissimum cum subsistit in primo gradu ac simplex phlogosis est, cum exiguam afficit partem parumque diffusa est, cum partem occupat sensu obtusiori præditam, aut remotiorem à corde, cum patiens temperamento acri præditus non est, fibrasque universas cordis nempe & arteriarum cæterasque corporis quancumque ob causam parum tensas quin potius relaxatas habet, cum inflammatio gangrænosa facta est, cum ægri vires dejectæ sunt; hæc enim similiaque causæ sunt, cur sanguis celeriter ad cor non redeat, cur cor vividè non stimuletur, cur cor ac arteriæ celeriter & intensè non contrahantur, cur febris causæ absint.

Cum è contrà inflammatio magnam corporis portionem occupat, cum in secundo gradu existit, cum partes afficit cordi viciniore, ut viscera ac præprimis pulmones, cum partes exquisito sensu præditas, ut articulos, pleuram, periosteum, oculum, aurem, cæterasque similes, cum æger naturâ impatiens acrive temperamento præditus est, aut quâlibet ex causâ fibras corporis valdè tensas habet, hæc omnia causæ sunt cur sanguis celerius ad cor redeat, corque & arteriæ celerius intentiusque vibrentur, cur febris excandescat.

Non inficiandum tamen cum Phlogosis quin etiam parum extensis, aliisve inflammationibus corporis partes exiguas aut parum exquisiti sensus aut etiam remotas à corde occupantibus, quæve in corporibus humidis ac relaxatis excitantur, febrem interdum reperiri. At in his universis casibus dispositio tunc adest inflammatoria universalis, quam in vasis minimis excitavit aliqua causa generalis, nulla enim febris absque statu vasorum minimorum inflammatorio lentis febribus nequidem exceptis, quod sanè assertum circa febres probaremus, & quomodo in quibusvis febribus ita se res habeat & quibuscumque varietatibus, nō digressio proluxior sermonis filum rumperet ostenderemus.

Quæ de inflammatione hucusque attulimus non tantum de partibus mollibus intelligenda sunt, verum etiam de ossibus, in quibus nimirum apparatus sanguiductuum minimorum vasculorumque ex arterioliis pronatorum perinde ac in partibus mollibus reperiri accurata docet Anatome; sic in periosteo interno cellulas ossium vestiente, sic in textu membraneo medullarem molem conficiente apparatus qui occurrit tum sanguineorum, tum secretoriorum vasculorum inflammationis ossa esse quandoque subjectum apertè edocet, observatio autem demonstrat. (a)

XXVIII. Causæ inflammationum remotæ eæ omnes sunt, quæ sanguinis transitum liberum è vasis minimis in venas protinè præpediunt, non enervatis tamen at vigentibus cordis & arteriarum viribus; binæ siquidem hæ conditiones desiderantur, quò suscitetur inflammatio, repentina nimirum difficultas ad transitum, nec non cordis arteriarumque vigor; secus si ni-

(a) Vid. Heine, de inflammatione ossium.

mirum sanguis paulatim lentescat, sensim cedunt arteriolæ, sanguis lentè per eas relaxatas transmittitur cum statu partis inflammationi opposito, si etiam cordis arteriarumque deficient vires sanguis lentè in vasa minima obstructa pellitur, ac vividè per libera, uti fit in partibus inflammatis, non truditur, unde nulla causa in vasis minimis augmenti motûs intestini ac progressivi sanguinis, quod tamen inflammationis essentiam constituit.

Causæ hæ remotæ sunt imprimis, quæ subitò aut inspissant sanguinem, aut in rarefactionem concitant, aut abundantiorē efficiunt, quæve fibrillas nimis stimulant, aut vasa sanguifera proritant, lacerant aut comprimunt. Eæ enim omnes causæ libero sanguinis per vasa minima transiui adversæ sunt, simulque cum sufficienti cordis & arteriarum vigore sæpe reperiuntur; quæ omnia ex speciali harumce inflammationis causarum agendi modo clariùs elucescent.

XXIX. Causæ inflammationum remotæ vel sunt res corpori nostro *Necessariæ*, quæ *sex rerum non naturalium* nomine designari solent, vel sunt *fortuitæ seu non necessariæ*.

Et quidem sex res non naturales quod spectat, Aër caliditatis aut frigiditatis impensioris præprimis ratione inflammationibus locum præbere consuevit. Cum is est calidior, partibus solidis habitudinis corporis, quas tangit, motum nimium communicat, easque in fluida contenta vibratiles nimis efficit, quibus quidem succussionibus nimis hæc motum vehementiorem suscipiunt intestinum, & ad rarefactionem concitantur; pari modo afficiuntur aëre calido os, fauces, pulmones, sanguinisque rarefcentia in pulmonibus potissimum impensè augetur. Sanguis in cute ac pulmonibus ita rarefactus non modo vascula cutis pulmonumque nimis inflat, sed & cum in reliquum corpus distribuitur, vascula minima ubique nimis distendit, unde difficultas ad transitum præcipuè in debilioribus, seu inflammationis status proximus. Sed & ab aëre calido agitatæ corporis habitûs fluidis, apertisque ultra modum poris ac hiatibus excretoriis serum tenue affatim diffatur, unde moleculæ in sanguine minùs dilutæ, crassiores, & in vasis minimis faciliè hærentes, quæ liberum sanguinis transitum præpediendo inflammationes procreant.

Aër autem frigidus motum in se suscipit partium minimarum cutis ac substantiæ pulmonum, imminuitur ergo in his motus fluidorum intestinus, hæc proinde non adeo rarefcent nec in vasorum parietes adeo agunt, quare nec satis mota nec satis fluxilia in vasis minimis manent, sanguinique vividè deinceps appellenti quasi obices sunt, ac in eo casu inflammationi in parte ipsamet ab aëre frigido affectâ locus præbetur; vel si inspissata adeo haud fuerint fluida, robustaque sint de cætero vascula ac fibræ, tunc hæc vi magnâ in contenta fluida utpote minore vi expansivâ donata resiliunt, stringuntur, citòque ea exprimunt, quare tunc fluidorum in reliquo corpore subitò crescit moles, ac vasa reliqua & quidem fluidis inspissatis ad

meandum parùm habilibus subitò nimis dilatantur; sique in vasis aliquibus minimis sanguinis ad transitum difficultas notabilis exurgat, inflammationi, at in eo casu in partibus aëre frigido non affectis, locus dabitur. Porro frigidi aëris in excitandis inflammationibus impressio tantò notabilior existit, quò corpus magis calet, tunc enim sanguis in cutis pulmonumque vasculis calore valdè dilatatis majore copiâ solito præsens est, unde major ejus moles inspissationi subitè obnoxia. Eam ob causam corpora, quæ æstuant, aëri frigido subitò exposita ad inflammationes proclivia.

XXX. Alimenta verò inflammationum causæ sunt frequentissimæ quatenus aut qualitativis aut quantitate nimis peccant. Et quidem cum qualitativis vitiosa sunt, fluida ex eis sanguini suppeditata aut rarefactionem nimiam aut crassitiem sæpenumerò derepente in eo excitant. Modo prior agunt cibi saliti, aromatici, acres, potulenta spirituosæ, ardentia; ex quibus omnibus particule suppeditantur abundanter sanguini duræ, tenues, ab aliis sejunctæ, mobiles, vasa stimulant, quæ à vasorum fibrarumque pulsionibus fluidorumque agitatione motus plurimum suscipiunt diuque servant cum determinationibus variis, unde sanguinis rarefactio, sive motus intestinus adauctus, in latera vasorum vehementius agens, vasa minima nimium dilatans, nonnullorumque vires enervans, libero sanguinis progressui sanè adversus, hinc ingurgitationes inflammatoriæ. At sanguinem crassiorem & ad fluendum minus habilem efficiunt, quæ ipsum coagulant, ut sunt cibi potulque acidi, quæve crassiores viscosas nimiumque compactas ei suppeditant moleculas, ut sunt substantiæ tenacioris cibi ac crassioris, ut sunt potulenta quadam viscosa aut fermentatione præviâ satis non subacta. In his enim casibus sive per coagulationem particule crassiores in sanguine progengerantur, sive ex alimentorum natura tales ei suppeditantur, aut etiam per inviscationis modum multiplicantur, in his, inquam, casibus moleculæ nonnullæ per vasa minima agere meant, obstructionesque excitant interdum inflammatorias.

Modis jam traditis inflammationes sæpè procreant, ac fovēt cruditates primarum viarum. Hæ enim sive ex alimentorum vitiis sive aliunde ortum duxerint fluida constituunt aut acescentia, aut spissa & viscosa aut bileficientia, aut valdè acria. Quæ acescunt per modum coaguli, quæ spissa sunt aut partes crassas suppeditando, aut alias de novo per modum inviscationis in sanguine producendo obstructionibus inflammatoriis occasionem præbent. Bileficientia partes nimium mobiles sanguini tribuendo rarefactiones phlogisticas suscitant, sed & cruditates, quæ bileficient, viscosam naturam sæpè sapiunt, indeque sanguini moleculæ accedunt & crassiores & tenues aliæ valdeque mobiles, fitque tunc rarefactio in viscoso ductus exiguos obstruente; quod quidem in praxi circa inflammationes frequentissimum est. Postremo cruditates acrimoniâ summâ præditæ & corrosivæ indolis particulas sanguini tribuunt valdè duras magnâ mole præditas, quæ

sanguinis viscosas discerpunt, vascula stimulant & in spasmum interdum concitant; unde motiones summæ in fluidis libero transitui per vasa minima adversæ, tum & nonnumquam ex fibrillarum spasmu angustia succedunt in vasculis fluidorum plurimum aliunde agitatorum cursum inhibentes, in quibus sane casibus inflammationes excitantur. Insuper à cruditatibus corrosivis stimulantur adeò ventriculi ac intestinorum fibrillæ, ut ab eis nimis vibrantibus rarefactiones sanguinis in eorum tunicis phlogistica subsequantur, ut etiam in spasmum fibrillæ interdum concitentur, vascula constringantur, fluidorumque agitatorum cursus in pluribus cohibeatur, unde inflammatio, quæ etiam ex laniena vasculorum vi summâ corrosivâ disruptorum oriri potest. At ex his postremis agendi modis inflammationes in primis viis dumtaxat excitantur quibus scilicet immediate applicantur cruditates corrosivæ.

Sed alimenta, quamvis euchyma, cum quantitate nimia sumuntur, inflammationum causæ remotæ fiunt, quatenus aut pravè digeruntur, & cruditatum indolis alicujus jam notatæ generationi ansam præbent; vel eò quòd licet probè digesta, nimia ex his succi chylosi copia sanguini affunditur, unde plenitudo nimia vasorum, & sæpe cum excitatâ exin magnâ tensione ac vibratilitate, resistentia interim ex parte abundantium fluidorum præsertim in vasis minimis adauctâ, hinc tandem nonnullorum ex his infarctus, sique vigeant vires cordis & arteriarum partis inflammatio.

XXXI. Motu corporis nimio contrahuntur ultra modum muscoli, sanguis concitatiùs è vasis minimis in magnas venas exprimitur, cordi velociùs offertur, hinc concitator ejus per vasa universa projectio, concitator sanguiferorum motus, agitatio intestina sanguinis nimia, rarefactio vehementior, ex quibus difficilis ipsius per vasa minima transitus unâ cum cordis arteriarumque viribus vigentibus, adeoque inflammatio.

Corpus autem cum nimis quiescit, feriat causa projectile sanguinis motum plurimum juvans musculorum nempe contractio; sanguis igitur cordis vasorumque actioni tantummodò expositus satis intensè haud propellitur, non discerpuntur satis ejus moleculæ crassiores fiunt ductibusque minimis obstruendis habiles; tum verò si causa accesserit cordis & arteriarum motum concitans, conditiones ad inflammationem procreandam jam præsentibus erunt. Ubi notandum à quiete seu torpore corporis inflammationes non tantum excitari, quàm disponi corpus, ut, si subito accesserint incitantes sanguinis periodum causæ, hæ & quidem graves ob fluidorum crassitiem excitentur.

XXXII. Vigiliæ cum diutiùs protrahuntur, diutiùs & remanent tensæ universæ fibræ, unde & vibratilitas intensior cordis & arteriarum in fluida nimis protracta, nec ut decet per somnum, quò fluida pacata fiant, satis mitigata, hinc agitatio tandem vehemens in particulis sanguinis, viscosarum discerptio, durarumque quasi sui juris factarum nimia activitas, aquosarum magna dissipatio, ex quibus rarefactio sanguinis intensior, ac in-

Inflammatio. Laxantur per somnum fibræ nervæ , idcirco segniùs moventur cor & arteriæ , feriuntur muscoli , segniùs & quoque moventur fluida , languidior fit motus eorum intestinus , incrassescunt eorum moleculæ ; quapropter si diutiùs somnus protrahatur ea tandem succedit in sanguine crassities ex quâ modo (in articulo XXXI. de quiete) tradito inflammationibus occasio præbetur.

His accedit , ex quiete nimia somnove nimis producto cum fluida crassiora fiant , lentèque protrudantur , imminui plurimum perspirationem , eamque hinc ad molem magnam in vasis evehi , sic ut inde succedat plethora , ac dispositio proxima ad inflammationem , quæ , cum ex quavis causa proritabuntur subito cordis arteriarumque vires , protinùs enascetur.

XXXIII. Sed ex excernendis , cum retenta in corpore fuerint quam sæpè suscitantur inflammatorii tumores ? Et 1°. quidem ex cohibita transpiratione augetur ultramodum in vasis fluidorum moles , hoc patet ex cognita fluidorum , quæ per habitum corporis dissipantur , quantitate à celeberrimis *Sanctorio* , *Dodartio* , ac *Keilio* in Italia , Gallia , Angliaque indubitatis experimentis detectâ. Quanta igitur ex tali cohibitione vasorum plenitudo ! Sed inde potissimum afficiuntur vasa sanguifera , quod moles sanguinis cutanei , quæ priùs ob jacturam portionis per foramina cutanea plurimum imminuta per venas ad cor reducebatur , nunc fermè tota , quæ per arterias ad cutem appulit , ad cor revehatur ; plenitudo igitur insolita in vasis sanguiferis protinùs suboritur , ex quâ in vasis minimis subitæ distensiones ac infarctus , hoc est inflammationis status proximus modo cordis subsistant arteriarumque vires , quod sæpissimè evenit.

At cum cohibita ex causa quavis perspiratione , ductus emissarii cutanei obstruuntur magnoperè & infarciuntur , non modò universim in corpore enascitur vasorum plenitudo & difficilis sanguinis per vasa minima transitus , sed & è vasis his infarctis ac tumentibus oritur exilium vasorum sanguineorum in cute compressio , difficilis sanguinis per ea transitus , ac infarctus tandem inflammatorius ; eâ de causa tumores inflammatorii frequentes in cute.

2°. Cum retinetur in mulieribus fluxus uterinus , sive menstruum sive lochiorum specie debita copia excernendus , non tantum universim augetur in corpore fluidorum lymphaticorum moles , sed etiam (quod suppressioni huic singulare est) globuli rubri sanguinei cum partibus fibrosis in sanguinis ductibus exuperant , hinc sæpe sanguiductuum plenitudines summæ ac difficilis admodum sanguinis per arteriolas minimas transitus , quæ , si resistant nec sufficienter ad exuperantis sanguinis effusionem rumpantur , infarciuntur , tuncque , cum non oppressæ sunt sed vigent cordis & arteriarum vires , tumores procreantur inflammatorii.

Ex dictis cuivis satis perspicuum fit , cur ex cohibitis fluidis aliis quibuscumque excernendis inflammationes quandòque suboriantur. Id enim in ga-

nere semper contingit, quod ex suppressâ excretionē quavis moles fluidorum in vasis deinceps exuperet; vel etiam quod vasa excernentia plurimum infarcta sanguineos exiles ductus comprimant in eoque casu inflammationes fiunt topicæ, hoc est locum eundem afficiunt, in quo excretio suppressa est.

Cum verò excernuntur, quæ retineri debuissent, fluida, inflammationibus & quoque ansa interdum sed rariùs præbetur. Ita si serum sanguineum tenuius sive ex sudore immodico, sive ob urinæ profluvium, diarrhæam pyralismum, nimium excernatur, succedit in sanguine vehiculi imminutio, viscerum crassique productio, ductuum exilium sæpe quasi exsiccatio ac strictura, hinc difficilis sanguinis per vasa minima transitus, ex quo cum cordis arteriarumque vigent vires (quæ conditio ex inanitione valorum in hoc casu sæpè abest), inflammatio supervenit.

XXXIV. Nec minùs valent ad inflammationes excitandas animi pathemata, ira autem imprimis ac tristitia. In ira enim fluidum nerveum uberiùs quoquo versum pellitur, hinc omnes fibræ corporis magis tensæ magisque contractiles, cor ergo & arteriæ acriùs pulsant, truditur vehementiùs sanguis, exagitur, rarefcit. Sed exagitationes illæ sanguinis hominis furientis clamoribus tum musculorum contractionibus validis admodum adaugentur, hinc tandem rarefcientia magna pacato & facili sanguinis per vasa exilia transire sanè adversa, adauctæque simul cordis arteriarumque vires, hoc est conditiones binæ inflammationem progenerantes.

In tristitia nervorum fluidum lentè ad partes accedit, hinc fibræ omnes debiles, cor arteriæque segniter pulsantes, lentor sanguinis insignis succedens in ductibus minimis, crassitiesque universim producta in fluidis. Quamobrem si causa deinceps accesserit cor arteriasque incitans, sanguis in vasa minima jam semi-obstructa derepentè validè projectus in eis ingurgitationes tenaces excitabit inflammatorias; præterea alimentorum digestio in tristitia agrè fit, fibræ enim vasaque ventriculi & intestinorum ob insufficientem fluidi nervei affluxum languent, nec nisi spissa viscidaque affunduntur alimentis fluida digestiva, quæ nec eorum textum satis penetrare nec fluida in eorum tubulis laceratis diluere, ab eisque citò educere valent, hinc aut producuntur cruditates crassæ viscidæque, aut si alimenta ob moram nimiam nec sufficientem fluidorum ab eorum textu exsolutionem fermentarint (quod semper fit præter naturam) cruditates exorientur pro vario fermentationis effectû modò acidæ modò bilescientes aut acrimonia summâ præditæ, inflammationum causæ remotæ. (30.)

Nec minùs perturbatur ex ira alimentorum digestio. Ex ea quippe fluidum nervorum cum impetuosè & non æquabili fluxu in ventriculi, intestinorum, tum etiam speciatim in vesiculæ felleæ aliorumque bilis conceptaculorum textum influat, viscerum chyloporum fibræ ac vasa validiùs ac inæqualiter contrahuntur, tunicæ eorum quasi spasmis hîc & illîc quaesuntur, alimenta que contenta turbulentè agitantur; sed & fluida digest-

tiva excernuntur à commotis & sanguine rarefacto plenis hisce visceribus ipsamet nimis agitata & velut æstuantia, hinc alimenta fluidis nimis activis penetrantur, nimiumque incallescunt, ex his ergo omnibus putredo suscitatur in alimentis fracedinosa, ex quâ cruditates exurgunt acrimonia magnâ præditæ, sæpiusque bilescetes; quæ quomodo inflammationes progenerant, jam antea (30.) ostensum est.

At cum iræ tristitia conjuncta est, tunc pathematis utriusque effectus velut commixti sunt, nunc enim ab ira fiunt motiones summæ in solidis ac fluidis nunc à tristitia solidorum segnitries fluidorumque hîc & illîc cohibitiones, mutationes illæ sibi invicem succedunt adeò ut tandem ex his motio exsurgat vehemens in viscido, quæ inflammationes, ut antea dictum fuit, procreare consuevit.

Multò diutius in explicandis rerum non-naturalium ad excitandas inflammationes agendi modis non immorandum, notabiliora circa hanc theoriâ tradidisse satis est.

XXXV. Causæ inflammationum fortuitæ innumeræ sunt, eas tamen ad capita sex revocabimus; hæ namque sunt vel corpora stimulantia, vel corrosiva, vel urentia, aut vulnerantia, aut comprimentia, aut obstipantia. Causæ hæ agunt in solida præprimis, licetque fluida aliunde benè se habeant inflammationes nihilo secius sæpè excitant, quæ equidem eò facilius progenerantur, cum vitiiis peccant fluida ad inflammationes idoneis.

XXXVI. Stimulantes particulæ quævis duræ sunt, exiguæ, penetrantes, non exiguæ tamen adeò ut fibrarum poros liberè permeare queant; hinc validè in eas impetunt impensè succutiendas, vel etiam & potissimum in earum substantia affiguntur quamplures ultrâ penetrare impotentes; fibræ ergo motu vitali in corpora hæc dura vibratæ, tenduntur ultrâ modum, ac succutiuntur molestè, hinc earum insolitæ retractiones, vasorum minimorum spasmî, tum subitæ fluidorum ac sanguinis imprimis in eis interceptiones. Sanguis autem minùs liberè fluens, ac in vasorum parietes impetens, tantò vehementius exagitur coercitus in suis vasculis, quò eorum fibræ proritatæ stimulis, robustiores exinde quàm cæterorum vasculorum, vegetius solito in sanguinem coercitum vibrantur, hinc attritus ingens fluidi sanguinei ad fluxum non obsequiosi, & vasculorum; adeoque partis status verè inflammatorius; qui adaugetur etiam propterea quòd stimulorum particulæ minores, quæ in vasculorum cavitatem trans eorum parietes penetrarunt, commixtæ sanguini, motui ejus intestino concitando, augendæque rarefactioni ob duritiem ac mobilitatem plurimum conducant. Modis prædictis inflammationes excitant vesicatoria, phænigmi, venena quævis acria, hujusve indolis medicamina parti alicui applicata.

XXXVII. Corrosivæ particulæ agunt in genere ut stimuli; cum autem particulis simpliciter stimulantibus grandiores sint ac duriores, dum agitantur à fluidis, potentiùs in fibras impetunt, tendunt eas ac rumpunt; aut cum eis infixæ sunt, fibræ in corpuscula valdè dura & mole sat notabili

prædita motu vitali impetentes , tenduntur adeò ac subito , ut particularum , quibus constant , cohesio solvatur protinùs , hinc ruptio fibræ ; quod cum in variis & pluribus fibris vicinis ex vi corrosivi dispersa in infinitis punctulis contingat , pars intimè lacerata conspicitur , diciturque corrosa. Corrosio ità , seu per tensiones fibrarum prædictas ac secundùm directiones quasvis dispositas disruptis vasculis quibuscumlibet , effunduntur ab eis fluida quævis ; vascula autem , quæ integra remansere , quæve ob profundiorum situm vim immanem corrosivi haud fuere experta , licet tamen aliquatenus stimolata , ex tali laniena percipiunt molestiam ; quod ab extravasatis fluidis & inspissatis , tum & vasculis laceris ac emortuis comprimantur , hinc fluidi sanguinei & alius cujuscvis interceptio repentina in vasis integris ; quod cum vasa lacera non transmittant amplius , fluidis appellentibus à corde vasa integra subito obstruantur , jam enim ipsa & proprio & alieno vasorum nimirum amplius non transmittentium munere fungi coguntur , hinc summopere & protinùs distenduntur vascula sanguine ægrè meante , eoque vehementius pulsant , quò corrosivarum particularum licet divisarum tandem ac enervatarum vim tamen aliquam semper passa fuerint , in modum stimuli , ut jam declaratum est , tunc agentem. Hinc vehemens sanguinoductuum agitatio in fluidum coercitum , fluidi sanguinei coerciti cumulati & à corde pulsi in sanguinoductuum exilium parietes actio gravis , attritus solidorum fluidorumque insignis , inflammatio. Modis prædictis inflammari partes evenit ex applicatione cauteriorum potentialium , aliorumve corrosivorum.

XXXVIII. Corpus urentium particula ignita in genere agunt ut stimuli , sique energia polleant vehementiore , ut corrosiva corpuscula , unde inflammatio partium quibus admoventur (36.37.) Insuper ignita corpora fibrarum humorem subito absumunt ; exsiccantur hæ & corrugantur , hinc vasculorum stricturæ hinc & illuc , inflexiones insolitæ & obstinatæ , quare fluidorum sanguinisque cohibitiones subitæ cum tensione summâ vasorum & dolorificâ , hinc attritio vehemens eorum sanguinisque ac inflammatio acris. Hisce modis inflammationes procreant cauteria actualia quibus utimur in praxi , corporaque quævis impensè calida & ignita sive fluida extiterint sive solida , inter quæ potentiùs agunt quæ igne magis abundant , sic oleum fervens bulliente aquâ agit potentiùs , non enim ebullit oleum nisi ad 600. caloris gradus paulò plus , dum aqua ad 213. ebullit , prout nos docent Thermometra Fahrenheitiana. (a)

XXXIX. Ea quæ vulnerant , vel secant , vel pungunt , vel contundunt. A secantibus solvitur secundùm idem planum particularum fibrarum cohesio , hinc vasa transversim dividuntur plura , pluraque in vulneratâ parte remanent integra , priùs ostendit fluidorum effusio , posterius vita partis. Quæ secta fuere vascula non transmittunt amplius , in eisque concresecunt

fluida quæ non effluxere; quare comprimuntur integra, cohibenturque in his fluida trusa, tantò magis quò fluida, quæ in rupta vascula derivari debuissent, jam ob obicem in eis ex concretione fluidi pronatum in integra influere cogantur, quæ proinde copiâ gravantur fluidi, hinc sanguinis in vasis integris cumulatio subita, tensio eorum & actio vehemens, inflammatio. His accedit vulnus dolore stipatum esse, quod vasa secta in semet retrahantur elatere insito, integrorumque compagem per latera continuam distrahant, hinc in vulneratæ partis substantiam integram fluidi nervi influxus uberior, tensioque vasorum illius nimia, ex quâ in contentum sanguinem vibratio eorum intenditur, vividiorque fit inflammatio. Quin imò præ dolore constrictiones spasmodicæ in partibus vicinis sympathicè excitantur, unde sanguinis cohibitiones subitæ in vasis plurimum tensis ac pluribus, adeoque extensæ inflammationes ac dolore summo molestæ. Ratio hæc ultima potissimum obtinet in partibus exquisito sensu donatis, ut sunt ligamenta, tendines, nervi, quibus quidem vulneratis nec integrè discissis, inflammationes atroces extensæque adeò excitantur.

Pungentia instrumenta ut secantia vulnerant, cum eo tamen discrimine, quod secantia secundum planum aliquod dividant continuum, pungentia autem velut in puncto lacerent, tot non solvant vascula pluraque integra intactaque relinquantur; inflammationes ergo eadem fermè ratione à pungentibus ac à secantibus producentur. Illud tamen notatu dignum est à pungentibus sauciatas partes exquisito sensu donatas magis quàm à secantibus dolere, quod fibræ plures in punctione quàm in incisione integræ salvæque maneant, ex integris autem pluribus distractis pendeat dolor intensior. Ex puncto igitur tendine aut nervo atroces adeo dolores, spasmi, tantæ molis tamque extensæ inflammationes.

Corpora contundentia comprimendo celeriter ac tendendo & quidem validè, vascula variis in punctis rumpunt, hinc crepaturæ plures, frustulaque vasculorum confusim fluidis effusis commixta, interjectaque vasculis aliquibus aut incumbentia cæteris integris, quæ profundiora contundentis corporis vim haud persentire vel eluserunt; ex his ergo vasorum integrorum compressiones, dolor, sanguinisque in eis cohibitiones subitæ, unde inflammatio. Insuper vasa utut integra servata à corporis contundentis vi distorquentur nonnulla, sanguinique liberè transmittendo imparia fiunt protinus, hinc alia inflammationis ratio. Accidit his omnibus (quodque vulneribus quibusvis inflammandis commune est) vascula, quæ integritatem servarunt fluidis obrui, eâ nimirum quantitate insolitò ac prætermodum suscepta, quam vasa rupta nec admittere nec traducere amplius valent. Verùm si in contusa parte per vasa rupta liberaliter effluerit sanguis, tunc inaniuntur integra aut saltem non replentur ultra modum nec fit inflammatio, prout observatur ex liberali hamorrhagiâ à contusione aut ex effusione sanguinis libera quæ fit in partium substantiam, suggillatio nemque efformat. Similiter in vulnere sectim inflicto cum hamorrhagia lar-

gior liberaque exitit, inanitaque fuere vascula, inflammatio nulla expectanda. Cum autem è sectis vasculis facilis quam è contusis erumpant fluida hinc cohibitiones sanguinis in sectis partibus non adeò facile succedunt ac in contusis, hinc & sæpius in contusis inflammationes quam in sectis. Effectus graves corporis contundentis ad vulnus usque infligendum, excitandamque propterea inflammationem hucusque descripsimus; cum autem ejusmodi corpus graviter adeò non afficit (sive quòd tanta vi in partes nostras non irruat, sive quòd minus durum sit, sive quòd partes nostræ in id validè admodum non impingant) ruptionesque vasorum nullæ factæ fuere, contusa nihilò secius inflammari sæpè observamus, uti nimirum à corporibus subito comprimentibus ac extendentibus nimium fieri consuevit (40.) ad hæc enim utraque corpora reducuntur, quæ contundunt absque vulnere.

XL. Quæ comprimunt corpora aut dura, aut gravitantia, aut tensa, sat insignis sunt extensionis, nec obsequiosa, situm datum obstinatè servantia. Si ergo corpora talis modi partialicui molli proximius accumbant, vasorum parietes in semet adiguntur imminutâ ductus amplitudine, nec fluidi contenti impulsive viribus diduci restituique valent; idcirco fluida trajici liberè nequeunt, hinc sanguinis cohibitiones in vasculis sive arteriosis sive venosis, compressio namque ea perinde afficit cum minima sunt. Sanguis interea appellit vi solitâ, quare vascula ad locum usque compressum summopere distrahuntur, tenduntur, vividè pulsant in cumulatam sanguinem ex mole adauctâ vi immani in vasa reagentem, quare attritus sanguinis vehemens vasorumque, adeoque inflammatio. Accedit insuper vascula semicompressa, quæ pulsant, in corpora impetere dura, nec cedentia locum, hinc attritiones eorum dolorificæ, ruptiones, quin etiam velut à corpore contundente (sive enim dura contundentia in partes adigantur, sive partes nostræ in corpora dura impetant, perinde est) tensiones integrorum commotionesque adauctæ, sanguinis contenti agitatio vehementior, ingravescens proinde inflammationis causa. (39) Inflammationes ita excitari observamus à fuscis aut laqueis partes nimis stringentibus, splenis pressius admotis, turundis impactis durioribus aut nimis molis, aut quibusvis carnes fascias nimium præmentibus, à luxatis ossibus fractisve partes molles comprimentibus, à corporibus exoticis magis minusve duris vi externa quavis in mollium partium substantiam intrusis, ut globulis plumbeis, lapidibus, arenis, ferreis ligneisque frustulis, vestium portionibus ac similibus.

Velut comprimentia firmè agunt in inflammandis partibus, quæ partes distorquent; ab his enim vasorum mutatur situs, parietesque in semet adiguntur, imminutâ aut etiam suppressâ eorum cavitare, interceptoque protinus sanguinis fluente; item quæ subito partes nimis extendunt, ex elongatione namque tantâ vasculorum parietes & quoque ad se mutuò adducuntur, imminuiturque protinus eorum cavitatis cum fluidi interceptione.

Accedit tandem à distortentibus aut extendentibus nimium partes, vascula lacerari ut in contusis (39.) doloremque atrocem ex tensis prætermo- dum fibris nerveis inferri, ex quibus inflammationi etiam locus datur. (39.)

Comprimendo sanguifera inflammationes etiam excitant culculi ac Tophaceæ concretiones, tuberculave in partibus corporis variis, quæ progignuntur, præprimis si ex quacumque causa sanguis solitò magis in vasculis vicinis æstum concipiat ac rarescat, nec ob adjacens corpus durum satis cedant, ut transfluat, eorum parietes. Ab Skirro perfectò eadem pariter interdum eveniunt, ut cum excitatur cancer. Quin imò ex ingurgitatis tantummodò lymphæ spissiori vasculis lymphaticis, præcipuè verò ubi in conglobatas glandulas strictè glomerantur vascula hæc, eò usquè premi sanguiductus, ut inflammationes suboriantur, monent nos bubones plurimi, strumæ, lupiæ, atheromata, similesque tumores lymphatici in principio, cum deinceps inflammantur. Exin sequens eruemus *COROLLARIUM*.

Licet in inflammatione producenda ingurgitatio prius in exilibus sanguiferis, arteriosis præprimis, fieri soleat, exindeque lymphatica, arteriosa potissimum, infarci eveniat, ut antea declaratum fuit, dantur tamen casus inflammationum nonnulli, in quibus è contra lymphæ ductus primariò, sanguifera autem consequenter ingurgitata fuere, ut in lue venerea, scrofulosa, cancroso statu & pluribus aliis casibus. Verumtamen ex hisce sanguiductibus sic ingurgitatis alia lymphatica prius libera deinceps ingurgitari possunt.

Postremò cum inflammata semel fuerit pars aliqua sanguifera vicina sana ab ingurgitatis premi, inflammationemque sic in majus spatium incrementum accrescere animadvertemus; adeò ut sanguifera inflammata respectu sanorum vicinorum, corporum durorum aut tensorum comprimementium vices obire, quæ novam inflammationem & hac ratione procreent, fateri cogamur.

XLI. Quæ obstipant, perspirationem suffocant; cum autem corporis habitus portio subitò non perspirat sufficienter, retinentur in sanguiferis nonnullis cutaneis fluida quæ per poros ductusque emissarios exhalare debuissent, hinc plethora eorum distensioque nimia ac subita, fluxus liber sanguinis prestinus impeditus, ac sæpè inflammatio. Eo modo inflammationes accercent admota superficiæ corporis oleosa, pingua, emplastica; imprimis si oleosa & adipēs rancida fuerint, emplastica verò acia seu per se seu pure aut sanie aut transpiratione acri infecta fuerint, quo nomine obstipantia hæc agunt quoque ut stimuli. (36.) Agunt etiam obstipantium modo, inflammationesque interdum excitant corpora frigida quavis, ac ea quæ *Repercussiva* dicuntur corporis habitudinis portioni alicui applicata. Verum præter hunc agendi modum corpora frigida solidorum fluidorumque motum vitalem in semet suscipiendo, hærentiæ subitæ sanguinis in vasis minimis occasionem præbent; siquæ deinceps à causa quacumque motus cordis vasorumque concitetur, sanguis in vascula ita obstructa ve-

hementer impulsus nec meare potens inflammationem producit. Insuper corpuscula frigoris quæ à frigidis emanant corporibus dura sunt, insuntur fibris, idcirco agunt ut stimuli corporaque corrosiva (36. & 37.) in excitanda inflammatione, vehementerque nimis frigus ita adurit. Verum cum frigida corpora tum ea quæ repercussiva audiunt, fluida plurimum inspissent in vasculis, sit ut à talibus causis pronatæ inflammationes gangrenodæ esse soleant.

XLII. Patet ex dictis (29. usque ad 41.) inflammationis causas præcipuas observabiles esse corpora obstruentia, tendentia, stimulantia, acria, corrosiva, urentia, secantia, pungentia, contudentia, prementia, distorquentia, extendentia, obstipantia, repellentia, quorum omnium in inflammatione excitanda agendi modi satis jam explanati sunt.

Patet etiam cur inflammatio quævis augeatur ac diffundatur ad certum terminum in quo postea subsistit, quod sanè à gradu energiæ ac multiplicatione variâ causarum memoratarum determinatur.

XLIII. Diversimodè terminantur inflammationes *Resolutione* nimirum, aut *Suppuratione*, aut *Induratione*, aut *Morificatione*. Et 1^o. quidem Resolutioni locus datur, quando nimirum vasa integritatem servarunt, nec fuere adeò tensa, ut tono penitus defecerint; sanguinis autem molecule aut motu vasculorum spontaneo aut à quavis aliâ causa medicamentosâ & auxiliatrice ita divisæ ac attenuatæ fuere, ut ipsius sphaerulæ fibrosæque partes fines arteriarum aut venarum principia permeare queant. Tunc enim fluido sanguineo factò ad fluxum obsequioso nec illatâ ampliùs in vasorum parietes vi immani, vascula systole restauratâ facili sanguinem ad venas exprimunt. Arteriæ lymphaticæ liberantur intereà ab infactu, quòd fluidum in eis impactum, ab eisdem causis attenuatum fuerit, nec tono pariter ipsæ defecerint; quòd sanguine arteriosos fines facilius permeante non dilatentur adeo arteriolarum lymphaticarum ostiola, nec proinde molecule sanguinis crassiores ut antea ipsa subeant, sero autem solummodò fluxili concedatur aditus, quo sanguinis globuli lymphaticis ductibus hospites exotici, mucilagoque fibrosa crassior eis inquilina diluuntur, sic ut tandem per vias lymphaticas ductus nimirum Bartholinianos in sanguinis oceanum undè deviarant, per productum sane & inassuetum valde iter tandem reduci possint. Restituto ita sanguinis lymphæque libero fluxu, vascula quæque sanguinea ac lymphatica ad pristinam reducuntur diametrum, nec fluidis congestis defatigatur pars; hæc ergo detumet, nec calida ut priùs, nec dolens, nec gravaminis aut molestiæ, ut antea, sensum inducens, nec rubea est, sit sana. Dum hæc peraguntur persentiri solet in parte pruritus, qui à fibrarum nervearum prius distractarum jam restituentium se, ac leviter contremiscentium commotione gratâ producit. Mador autem, quo perfunditur pars dum ab inflammatione per resolutionem liberatur, à fluidis ampliùs non impactis, attenuatis, fluxilibus, quorum tenuiores particule liberè perspirant, imminutoque partis

his calore faciliùs condensantur, ortum ducit.

XLIV. Cùm rupta fuere in inflammata parte vasa sanguifera ita tamen ut quamplurima integra servata fuerint, effluit protinùs è vasis ruptis partim fluidum, reliquum ejus in ipsis subsistit vi elasticà in semet retractis, inspissatur, cessatque penitus per ea transfluxus vitalis. Vasa interim vicina integra inflammata vehementer pulsant, eòque magis quò sanguinis moles, quæ in vasa ante ruptionem influebat, nunc propter obicem in eis ruptis insuperabilem in vasa integra deriveretur, hinc vasorum integrorum ingurgitatio ulterior, vehementioresque pulsiones ac duræ, quibus quidem vasa rupta velut sacci inertes flaccidi spisso fluido ceu amurcâ pleni plurimùm unlesuque premuntur, quare amurca hæc attritur, commiscetur, globuli rubri coacervati eliduntur, subiguntur, delentur, in pastam informem vertuntur reliquæ mucilagini serosæ dilutiori ac parti fibrosæ spissiori pariter subactæ commiscendæ, ex quâ miscela intimâ ac æquabili fit tandem liquamen spiciusculum albicans, pus; quod quidem viribus ambientibus eisdem prementibus undequaque è ruptis vasculis expressum per infinita ostiola sic diducta effluit; sique inflammata pars suppurans vulnerata sit, purique effundendo pateat extrorsum via, tum vulneratæ partis superficies pure irroratur, fit *ulcus*. Si verò expresso è vasculis ruptis puri extrorsum via haud pateat, tunc in substantiam partis effunduntur puris gattulæ innumeræ, colliguntur, fit puris lacus conclusus undique, procreatur *abscessus*. Verùm cùm partes ambientes pus collectum universæ elatere polleant, pus conclusum premitur undique, cūque pressio per omnia puncta æqualis esse non soleat, puris moles in partes debiliores, hoc est quæ minùs premunt, dejicitur trusa; hinc diductiones fibrarum, membranarum, ruptiones tandem earum, puris expressiones hîc & illîc in partis substantiam velut per cuniculos, si nimirum ob claustrorum resistantiam nimiam quamcumque foràs duci nequeat; si verò lacus puris ad partis superficiem pertingat, nec obtegens claustrum spissum fuerit aut robustum, vires intimæ pus prementes, nimirum carnes solutæ vi elasticâ sese constringentes, id in partem hanc protrudunt superficiariam debilemque, quæ cedit elevatur in tumorem ceu in umbonem, rumpitur tandem continuò distracta ac pulsa, per rupturam pus exprimitur, effluit, pars liberatur ab ejus gravamine, abscessus in ulcus abiit. Quocumque autem modo sive sub Ulceris, sive sub Abscessûs formâ pars suppurata sit, rupta vascula, in quibus pus fuit elaboratum, inaniantur, pressioni integrorum cedunt penitus, ac oblitterata cavitare in fibras abeunt solidas tenuissimas, hinc vasa integra circumposita liberiùs dilatantur, fluidaque traducunt, sic tollitur in his inflammatio per modum resolutionis, undè suppurata pars expurgato pure ab inflammatione liberatur. Suppurationem resolutioni famulari tunc diceres, eamque præviam necessariò requiri, quò fausta succedat resolutio in casu posito pronuntiaries.

COROLLARIUM. In casu hujus articuli (44.) resolutione termina-

ur semper ultimò inflammatio, cum perfecta sit sanatio, nec resolutio
causa expectanda nisi prægresso suppurationis opere absolutoque.

SCHOLIUM PRIMUM. Licet factò abscessu pars liberetur interdum
ab inflammatione, sæpè tamen evenit ut à mole conclusi puris spemēte
nimium ac distendente vel ab ejus acrimonia stimulante, vascula sana la-
befactentur adeò, ut perseveret in eis inflammatio, nec nisi per aperturam
abscessus sive spontaneam sive Chirurgicam educto pure ad eum statum re-
luci queant, ex quo penitus evanescat per resolutionem inflammatio. Qui
plura circa suppurationis opus expetit, dissertationem *de suppuratione*
adeat.

SCHOLIUM SECUNDUM. Abscessu factò fit etiam ex puris gra-
vitate, ut id pro vario sita interdum ad partes externas distendendas con-
fluat rumpendæque, interdum in substantiam partium intimam se infuset
diducendum diversimodè in intercapedines & cryptas, unde *Sinus* effor-
mantur & *Fistula*.

XLV. Abiit in indurata inflammata pars, cum resolutio sit tantum
in sanguiferis, relinquitur autem in lymphaticis lymphæ spissa, impacta
plurimum, resolutionis incapax, quæ ita inhærens morâ tandem duritiem
adipiscitur, sic ut tandem pars deprehendatur dura; at ob solutam inflam-
mationem in sanguiferis dolore, rubore, & calore impenso carens. Ita
autem terminatur inflammatio cum vasa sanguifera robusta sunt debilia au-
tem lymphatica; cum in statu inflammationis dilatatis plurimum lymphati-
corum ostiolis crassiores ac fibrosæ massæ sanguineæ partes magna mole
præditæ ductus lymphaticos subiere; cum lymphæ crassæ quæ inflamma-
tionis vi ductus penetravit lymphaticos in eis à frigore aut percussivo quo-
vis intempestive admoto aliâve causa quâvis ulterius inspissata & cohibi-
ta fuit, dum sanguis calidior & in vasis robustioribus contentus tantam ab
his causis noxam non suscepit, quin ad fluendum compelli iterum po-
tuerit.

XLVI. Cum suffocatur intra breve tempus in inflammata parte vi-
tale principium, cum videlicet vasculorum præprimis sanguineorum motus
cirò infringitur plurimum, fluidorum autem imprimis sanguinis intercipi-
tur admodum progressio, inflammatio mortificatione terminatur. Quæ ergo in
casu duplici supervenit.

Et 1°. Quidem cum ex inflammationis causarum (36. 37. 38. 39. 40. 41.)
gravitate vasa sanguinea partis eò usque, infarcta & dilatata fuere cuncta,
aut ferme cuncta, ut restitui vix possint aliquantulum, vix agant expriment-
que fluida, iis autem non meabilibus continuo magis & magis infarciuntur,
ac ulterius obstruantur ad crepaturam quam proximè perducta, tunc admo-
dum infractum est vitale principium vasis licet servatis in parte integris;
pars igitur intumescit plurimum, è rubea fit livida, prius acutè dolens
nunc obtuso sensu prædita est, frigescit, inflammatio tunc in gangrenam
abiit. Siquè evedta ulterius causarum (36. 37. 38. 39. 40. 41.) efficaciam, eò

pervenerit vasculorum infarctus, ut pulsare penitus desierint, fluidis in eis integris manentibus immotis, tunc pars horrendè livescit aut fœdè pallet frigore corripitur mortifero, nec sensus ullius aut caloris vitæ percipitur in eâ scintilla, pars demortua est viventi corpori quamvis coharens, ac sphacelo correpta dicitur; quæ quidem horrendam magis adhuc deinceps exhibet faciem, quòd cohibita penitus fluida cadaverosa facta putrescant, vascula, quibus coercentur, sive rarecendo sive rodendo undequaque rumpant ac lacerent, partemque in putidam putrilaginem fœdunque tabum immutent.

2º. Cum propter causarum (36. 37. 38. 39. 40. 41.) vehementiam intra breve temporis spatium, vasa quæque, sanguifera imprimis, longe plura quam in suppurationis casu (44.) disrupta lacerataque fuerunt, per nonnulla tantum paucissima, quæ integra servata fuere, peragitur adhuc fluidorum vitalis tractio; quæ tamen plurimum impedita est, quòd inertium ruptorum vasculorum, effusorumque fluidorum pondere ac mole vascula hæc integra comprimantur plurimum, ac velut obruantur. Iis ergo nominibus sive quod vitalis fluidorum tractus fiat per vascula paucissima partis integra, nullatenus per innumera rupta, sive quod ea quæ sit parca tractio languidè quoque peragatur, scintilla vitæ vix aliqua in parte remanet, eoque pacto inflammata partem gangræna quoque corripitur contingit. Cum verò cuncta penitus in parte vascula vi immani causarum (36. 37. 38. 39. 40. 41.) rupta lacerataque fuere, aut quæ nonnulla remanere integra omnimodè compressa extiterunt intercluso penitus fluidorum per ea meatu, periit tunc undique in parte vasculorum motus fluidorumque progressio, hinc principii vitalis suffocatio omnimoda, partis necrosis sive mors, sphacelus. In eoque casu vasculorum frustula effusis fluidis sanguineis cæterisque inspissatis, cadaverosis, partibus tenuioribus per exhalationem orbatis commixta pastam veluti efformant, quæ citò exsiccata atra fit, dura, speciemque crustæ refert, quæ ob similitudinem cum parte ambusta *Eschara* à Græcis dicta fuit, partem tegens gangrênâ subtus ut plurimum affectam, aut saltem suppurantem.

XLVII. Inflammationis conspicuæ cujusvis hæc sunt notæ, partis tumor quivis, rubor, calor, dolor quicumque, tensio, renixus. Hæ inquam notæ sunt quibus Medicus certò partem pronuntiat inflammata, cum pars in propatulo est. Dum verò internæ partes & abditæ inflammatae sunt, signa cuncta hæc manifesta neque sunt, latent enim sæpe partis tumor, rubor, tensio ac renixus, quin etiam interdum calor. Verum in quavis inflammatione ut ut reconditæ partis, æger dolorem semper persentit sive atrocem, sive obscurum, aut saltem molestiæ sensum in parte ipsamet affectâ, nè exceptis quidem Encephalo ac substantia ossium, cum has partes inflammari contingit. Sed & præter dolorem inflammata internæ partes nonnullæ hæc etiam exhibent signa tumorem, calorem, tensionem, renitentiam, ut sunt abdominis viscera, ea imprimis quæ musculis epigastricis regentibus ac mol-

liter stratis subjacent, intestina nimirum, tenuia præsertim; ventriculus; item uterus & vesica, cum mole ultra ossa pubis eleuantur, omentum, item hepar lienque cum ultra costarum limbum descendunt ac extenduntur.

XLVIII. Quò remotas, quæ inflammationibus excitandis locum præbuere, causas detegat Medicus, in rationem victûs imprimis inquirere debet; tùm & circa res qualvis non-naturales, deinde circa causas fortuitas universales jam antea (36. usque ad 41.) traditas inrerrogandus æger, qui spontè sæpe eas declarat, quæque etiam ex partis affectæ statu simpliciter considerato satis ut plurimum patefunt, ut cum vulnerata est pars, aut ambugta, aut corrofa, & sic portò. Intereà utrum præfentes adfint in primis viis pravi fucci per propria signa fedulò Medicus investigare debet, à pravo fi quidem in primis viis fuccorum apparatu inflammationes pluries excitantur, aut fovenitur faltem fæpiffimè, fic ut eo ignorato cura rectè procedere nequeat, cùm fubfifiat nimirum intacta caufa fovens.

XLIX. Inflammatio in genere morbus eft acutus, periculofus nimirum, brevique fua percurrrens tempora, principio enim vitali directè adverfatur, cùm fanguinis tranfitus per vafa minima liber impediatur, hinc fit ut magna mortalium pars inflammationibus de medio tollatur, prætereà ex inflammatione datà mutatio infignis in fanguinis circuitu fæpe excitatur, quæ conflituuit febrem, ex qua ingurgitationes in aliis partibus exfufcitari poffunt lethales. His omnibus accedit ex dolore fuccedere vigilias, convulfiones, defectiones virium, cùm intenfus eft, quæ omnia nihil boni portendunt.

L. Prognôfis intereà circa inflammationem fpeciatim varia inflituenda eft, nimirum pro affectæ partis indole, ex tentione tumoris inflammatorii, loco, causâ, inflammationis gradu aut fpecie, terminationis modo. Et quidem ratione partis affectæ, fi inflammata pars talis fit, ut ad vitam plurimum conducat, & circulatio fanguinis totalis eâ infarctâ fupprimi protinûs queat, tunc de hujufmodi inflammatione malè ominandum, ita periculofiffimæ funt inflammationes cerebri, pulmonum, inteflinorum in magna extensione affectorum, hepatis. Multò magis periculofa, nimirum lethalis erit inflammatio, fi cor afficiat, cùm enim actio ejus fit mufculofa, perennis, & prima motrix vitæ, mufculi autem inflammati ad contractionem & relaxationem alternatam inhabiles fiant, patet ruinam corporis univerfam ex inflammatione cordis citò fore fubfequendam. Prætereà fi inflammata pars talis fit ut ejus officium ad vitam abfolutè exercendum requiratur, ex inflammatione autem impediatur aut celfet, periculofa tunc judicanda inflammatio; fic periculofæ funt inflammationes ventriculi, inteflinorum, lienis, renum, veficæ, veficæ colli, pharngis, laringis, diaphragmatis; ac univerfim ob allatas rationes periculofæ funt partium quarumvis internarum inflammationes. E contra verò fi affecta

pars ea sit ; ut ex ejus infarctu inflammatorio ruina circulationis non imminuat , ejusque cessante officio vita nihilominus incolumis servari queat , tunc ex eo respectu faustè ominandum erit ; sic eo nomine periculo vacante aut eo ita gravi saltem non stipantur inflammationes partium externarum , ut integumentorum , musculorum non profundæ , quæ tamen aliunde periculosæ esse possunt. Iterùm , si inflammata pars talis sit ut textu gaudeat valdè tenso ac sensibili , vehementia ex acuto dolore pronato inferentur symptomata , ut vigilie , delirium , convulsiones , lypothimie , syncopes , febris acuta , ex quibus periculi aut saltem molestiæ plurimum inferetur. Eâ re periculosæ sunt aut saltem molestissimæ inflammationes membranarum internarum nervearum valde aut plurimum tensarum , ligamentorum , tendinearum partium , periostei.

LI. Ratione extensionis tumoris inflammatorii , patet ubicumque inflammatio adfuerit sive in internis sive in externis partibus , eam periculosiorem fore quò magis extensa extiterit , & è contrâ minus periculi exhibitarum quò minus fuerit extensa ; in priori namque casu sanguinis difficilis erit circuitus in pluribus vasis , in posteriori verò in paucioribus , unde noxæ tum præsentis tum subsequentiæ in priori casu graviores erunt , in posteriori minus graves.

LII. Ratione loci , periculosius est partes inflammarî internas quàm externas ; illud patet cognito earum officio , tum & quòd internis affectis minùs opitulari possit Chirurgia. Cùm autem inflammatione afficiuntur externæ , periculosius est eas profundè affici , quàm cùm in superficie & habitu corporis afficiuntur , tum ob ultimam rationem , tum quòd malum magis delitescat & profundiores clam agere possit strages , ægrè dein emendandas.

LIII. Ratione causæ , quæ à causis internis & abditis procreantur inflammationes in genere periculosiores sunt , quàm quæ ab externis & evidentibus , priores namque causæ subsistere solent morbumque fovant ægrè eradicandæ , posteriores autem aut non subsistunt aut ut plurimum removeri possunt. Cùm inflammationes à vitio fluidorum excitatæ fuere & foveantur eæ magis aut minùs periculosæ sunt , medelamque facilem aut difficilem , certam aut dubiam , nullamve admittunt , juxta indolem vitiosam fluidorum. Cùm tales autem constituuntur inflammationes , ut ex vitio fluidi ingurgitatio primò inceperit in arterioli sanguineis , eæ acuti morbi naturam sæpè sapiunt , nam circulatio sanguinis directè oppugnatur , etenim vitium idem fluidorum , quo immeabilis fit sanguis in parte inflammata , ægrè meabilem sæpè eum efficit in cæteris arterioli minimis magis aut minùs , quod tunc semper fit cum periculo & diù durare non potest. Illud docent nos omnes inflammationes à vitiato protinùs sanguine productæ & febre acutâ stipatæ. At inflammationes in quibus ingurgitatio præcessit in lymphaticis aut vasis secretoriis , lentiori gradu incedere , nec periculum adeò citum inferre solent , quòd sanguinis circuitui ita directè non adveniant ; atque utut alio nomine periculi plurimum interdùm in

erant ; quin & in ruinam certam ægrum nonnumquam ducant acuti morbi speciem sæpè non habent , quòd in hisce casibus intercipi possit in data parte liber sanguinis transitus , dùm liberè satis in reliquo corpore peragitur , vitio nimirum in parte lymphaticâ tantum tunc subsistente. Hæc omnia docent nos inflammationes à vitio lymphæ , ut inflammationes scrophulosæ , cancroas , & syphiliticæ quamplures , item inflammationes plures dysentericæ , & tuberculorum pulmonarium.

LIV. Ratione inflammationis gradûs aut speciei , patet phlogôsim minus allaturam periculi , multò magis autem periculosam fore inflammationem perfectam , præprimis si globuli sanguinis in lymphatica deviarint ; cum in priori casu non ita sistatur sanguis ac facilè resolvi possit , in posteriori autem in transitu admodum præpediatur , & infarctus contumax sit ac ægrè resolubilis , magisque adhuc cum lymphatica sanguine (nimirum liquore alieno & spissiori) onusta sunt. Porro inflammatio cum vasorum ruptione , *Systrophica* appellata , interdum periculosior est eâ in qua rupta non fuere vasa , interdum minus periculosa ; & quidem periculosior est cum ruptis valis inflammatio nihiloscitùs gravissima inducit symptomata , id enim denotat inflammationis causam gravissimam & infarctum vasorum summum , minùs autem periculosa est , cum ex vasorum ruptione inflammationis levantur symptomata , illud enim significat per hæmorrhagiam levare vasorum integrorum cum ruptis communicantium infarctum , veluti fieret à missione sanguinis revulsivâ. Hæc omnia docent nos quàmplurimi peripneumonix casus & inflammationes plures partium sauciatarum. Postremò inflammatio gangrenòdes in genere pessima est , quòd vitale principium plurimis nominibus ferè extinguat , quod deinceps enucleabitur , dum de noxis inflammationis in gangrenam tendentis præfagiendis agemus.

LV. Ratione modi quo terminatur inflammatio , ea minùs periculosa minùsque molesta habenda , quæ per resolutionem abit , fluida namque tunc vasa priùs ingurgitata & obstructa iterum percurrunt liberè , nec principii vitalis legibus ampliùs adversantur , nisi eum excipias casum in quo criticè & salutare in principio institutæ fuerunt inflammationes ; eas enim resolvì periculosum sæpe est , quòd materia obstruens crassa & vix meabilis in sanguinis orbem reventa alia vasa cum majori periculo obstruere queat , ideòque periculosissimas ac lethales interdum in partibus intèrnis obstructions inflammatorias excitare ; quodve ea materia sanguini remixta universalem fluidorum massam inquinare possit subsequèntibus gravioribus malis. Prius docent nos parotides & bubones cum in febribus malignis suboriuntur , subito dein evanescent , item carbunculi cum cita ac efficaci medicatione non oppugnantur ; ortis hinc inflammationibus aut cerebri , aut pulmonum , aliarumve partium internarum ut plurimum gangrenòdæis ac exitiosis. Posterius declarant bubones venerei cum absquè applicata medela universalem fluidorum massam emendante resolvuntur , tunc enim inquinatur ulterius lue venereâ fluidorum moles ortis hinc gravioribus & ci-

tationibus symptomatis.

Porro resolutione terminandam fore inflammationem præcognoscitur, si remittentibus symptomatis, febrique, si adfuerit, pruritus in parte percipiat (vid. Art. 10. 13. 42.) calor tendat ad naturalem, pars sensim detumeat, leviorque ægro videatur, ac velut emollita & interdum humescens deprehendatur.

LVI. Cum autem in suppuratam abit inflammata pars, terminatio inflammationis prælagenda semper molesta, & tunc aut multum ominandum periculi aut prælagitur salus. Et quidem terminatio hæc molesta ominanda; 1°. Quod hæc fieri nequeat sine adaucta adhuc inflammatione, ita ut crepent plurima vascula imprimis sanguifera, quod semper fit cum summa tensione partis affectæ adaucto admodum calore, adauctoque dolore qui pulsatilis sæpè est & acutus, pronascentibus etiam exinde gravibus symptomatis, ut febre quæ exoritur aut exorta intenditur, vigiliis, anxietatibus, motibus interdum spasmodicis & similibus, inflammationis summæ signis & effectis; 2°. Quod eâ facta sequantur ulcera aut abscessus, in quibus curandis aut usurpanda varia remedia aut adhibendæ etiam chirurgiæ.

Jam ex terminatione suppuratoria multum periculi erit prælagendum, ratione partium internarum in quibus hæc continget, ratione partium externarum profunditatis, & ratione prævæ fluidorum constitutionis jam positæ, etenim 1°. In partibus internis mutatio hæc fit semper cum notabili functionum læsione (ut patet cognitio earum actionibus & usibus) pus verò deinde factum aut nullatenus aut difficilè ab eis expurgatur, unde ex ejus permanentia, indeque destructione organi, cumque sanguine communicatione facili & remixtione, aut cita mors aut ruina sanitatis paulatim inferenda sæpè ad interitum certum ducens; dum autem præcaveatur hæc totalis ægerque restituitur, illud semper fit non sine dubio successu cumque medicatione difficili. 2°. In partibus externis profundis plurimæ inducuntur molestiæ, aut si graves non inducantur & clandestinè incedat suppuratio, cum pus extrâ non ejiciatur, retineatur autem, sequuntur effectus graves puris conclusi, gravamen in parte affecta sæpè intolerabile, febris interdum acuta, sæpius lenta, corporis consumptio à pure remixto & massam fluidorum universalem inquinante tum & à molestia dolorificâ semper præsentè interdum ingravescente, puris insinuatio in partes vicinas, productio sinuum, fistularum generatio, gangræna nonnunquam. Præterea cum via ad exeundum puri in profundo delitescenti erit paranda, chirurgiæ adhibendæ erunt sævæ, dolorificæ, ægro fortè intolerabiles, compositæ, interdum dubiæ, ac summe periculosæ. 3°. Cum fluida de cætero prævè se habent, aut etiam lue aliquâ infecta sunt, opus suppuratorium sæpè fit adhuc cum majori molestia, gravioribusque symptomatis, ac interdum concidit succedente gangræna, aut cum absolutum est sequuntur abscessus vel ulcera multum inferentia periculi, sanatu difficilia.

aut sanationem respicientia.

Verùm ex terminatione inflammationis per suppurationem ægro præstatur salus aut saltem minus deterior status; 1^o. Cùm hæc est critica, expurgantur enim ejus ope & à consortio fluidorum circulantium ablegantur succi pravi jam in partis inflammatae vasis velut incuneati, nunc verò mutati, & sub forma puris foras ejecti. Illud accidit in variolis, in bubonibus & parotidibus criticis suppurantibus, in abscessibus musculorum criticis. 2^o. Cùm ingenti afficiuntur inflammatione nec resolubili partes externæ & superficiariæ, hic enim tunc solus superest modus, quo terminari facilius queat inflammatio, aliunde autem via puri eliciendo facile patet, aut paratur. Hic autem supponimus fluida in crasi nullatenus aut parùm peccare.

Porro suppuratione inflammationem fore terminandam prædicitur (vid. Art. 10. 13. & 44.) cum dolor, calor, intenduntur præcedentibus ut plurimum horroribus irregularibus, pulsationis sensus adjungitur, febris aut supervenit aut intenditur, majoresque accedunt anxietates; quæ signa tamen cuncta interdum non simul obijciuntur imprimis in clandestinis aut levibus suppurationibus parandis, & tunc prædici certò non possunt ejusmodi terminationes suppurationis, nec nisi factæ cognoscuntur, quin & aliquando à peritis etiam ignorantur. Suppurationis factæ signa (Art. 13.) indicata fuere, talium autem effectuum æthiologiam dum de abscessibus & ulceribus sermo erit, trademus.

LVII. Terminatio inflammationis per indurationem interdum periculosa sed remotè, interdum minimè periculosa, vix tamen unquam optanda. Et quidem interdum periculosa est, utut enim eà facta sedata omnia videantur symptomata, ex ejusmodi indurationibus ponuntur sæpè indoles Skirri pravi & omnes ejus effectus deinceps exponendi. Minimè periculosa erit cùm pronascentur skirroscæ concreciones benignæ naturæ, resolubiles sine periculo, aut per operationem chirurgicam ablatu faciles nullo sequente damno. Vix tamen unquam optanda erit, quòd morbus semper remaneat aut medelam difficilem exigens & longam, aut chirurgicam, si brevior expostuletur aut alia nihil proficiat. Prælagitur autem talis terminatio, (vid. Art. 10. 13. & 45.) cum imminuitur tumoris inflammatorii moles, minuitur dolor & calor, simul autem tactu magis renitens, ac velut indurefcens percipitur tumor, colore rubro sensim evanescente, redeunte colore partis naturali, aut in albicantem abeunte.

LVIII. Postremò inflammationis terminatio per mortificationem periculosa sæpè comitata, interdum lethalis, interdum exitiosa parti affectæ tantum ægro nimirum superstitè, interdum non periculosa, semper tamen mala nec unquam optanda. Et quidem prælagitur periculum si hæc in magna corporis portione excitetur; si hæc in corpore cacochoymo; si in corpore debili ex morbo prægresso aut senio aut aliâ causa, si in parte textus teneri ut in oculo, ore, vagina, ano, membranis adiposis (quod sæpe

contingit) supervenerit ; in his enim casibus aut fluidorum progressio cohibetur faciliè in partibus affectis , ita ut ad mortem seu sphacelum duci possint quin & vicinæ magis magisque afficiantur , aut communicata labe plurimum inquinantur fluida miasmatis cadaverosis & adeò in miscela & constitutione particularum immutantur , ut veluti succumbant , hoc est non amplius apta fiant ut vasa minima faciliè perluant (vel propter aduertas nimis moles particularum nonnullarum , quæ capillaria quæque obstruunt , vel propter dissolutionem nimiam , unde vasa satis ad diastolem ducere non possunt , vel propter acredinem pronatam , quâ vasa nimis stimulant & ad stricturam nimis inducunt) quapropter dejiciuntur vires , actiones omnes languidè exercentur , impendit corporis totius ruina.

Lethalis est terminatio hæc , cum afficiuntur partes internæ , utpote quibus cum opitulari nequeat medicina auxiliis topicis , mortificatio abire soleat in sphacelum , aut ea extendatur etiam in primo sui gradu ita ut sanguinis circulatio succumbat. Ita lethalis est ejusmodi terminatio inflammationis in cerebro , pulmonibus , ventriculo , hepate , liene , renibus , utero , aliisque visceribus , nisi intestina excipias in eo tantum casu , in quo per aperturam à Chirurgo aliove modo institutam , ita sensibus artificis patent , ut applicationibus topicorum aut operationibus chirurgicis exposita sint , in quibus quidem circumstantiis curata vidimus interdum intestina gangrena correpta , non tamen sine magno vitæ discrimine , & nonnunquam molestiis gravibus toto vitæ decursu perseverantibus , uno nimirum artificiali exinde efformato. Lethalis quoque est ejusmodi terminatio cum corporis portio maxima afficitur , cum corpus in summo gradu cacochymum aut debile est ex quacumque causa ; quæ omnia faciliè patent ex eis quæ summam jamjam prolata sunt circa periculosas ejusmodi terminationes.

Interdum mortificatio parti tantum affectæ exitiosa est , æger ceterum superstes fit ; cum nimirum hæc est in summo gradu , ita ut sphacelus necessariò subsequatur , interea principium vitale in toto corpore vegetum est , qui quidem casus imprimis obtinet cum inflammatio à causis externis fuit suscitata , & in exterioribus corporis partibus.

Postremo periculo comitata non est mortificatio contrarias ob rationes , nimirum quando non est in gradu evecto , simulque afficitur externa pars & in parva extensione ; corpus autem robustum est nec ulla labe inquinatum. Hæc tamen mala semper nec unquam optanda , cum vitali principio opprimendo directè intendat , nec illius ope ægro aut levamen aut morbi solutio accedat unquam.

Verum prælagitur inflammationis talis exitus cum inflammata pars minus rubere , calere , ac dolere incipit , simulque ad lividum mutatur color partis , tunc enim fluida cohiberi magis in vasis simulque vires eorum fatiscere indicium est ; prælagitur quoque cum inflammata pars è contrâ

quasi derepente magis tumet ac tenditur, simul ultra modum incalescit accedente dolore intensissimo ac velut ustorio, ea enim indicant vasa utcumque tensa ac resistentia ad crepaturam proximam à fluidis æstuantibus & cum ingenti attritu distendentibus fuisse adducta, ita ut vero simile non sit ea posse resistere; quin potius hæc subito aut veluti immota manere aut crepere, ac hinc & illic ferè in toto tractu lacerari, debeant. (vid. 10. 13. & 46.)

LIX. In curanda inflammatione indicatio generalis est procurare per vasa minima liberum sanguinis progressum, eo namque restituto aut libera sit protinus ab infarctu inflammatorio pars, si affecta tantum fuerint sanguifera, aut consequenter dissipatur ut plurimum infarctus etiam lymphaticorum, si is adfuerit, sero solo tunc in lymphatica derivato & partem rubram sanguinis crassamque in eis deviam diluente. Cum procuratur artis ope liber is transitus absque vasorum ullorum damno ruinave curatio instituta dicitur per resolutionem simplicem. Cum autem liber is transitus procurari nequit per vasa minima, nisi prius rumpantur nonnulla ex his ac excitetur suppuratio, tunc sanatio dicitur per suppurationem, quod ea prævia requiratur, antequam transitus liber fluidorum per vasa integra, quæ supersunt, restituatur. Et hic est tantum duplex inflammationem perfecte sanandi modus. Eam enim indurari est sanari imperfectè, cum vasa lymphatica infarcta maneant nec pars affecta libera fiat, mortificari autem est eam in sui excidium tendere. Quamobrem medicina inflammationem curare debet tantum aut per resolutionem, qui modus anteponendus est ut plurimum, & semper optandus in inflammationibus internis, aut per suppurationem, qui modus est instituendus aut ex necessitate (nimirum resolutione simplici interdum impossibili) aut consilio, ut in inflammationibus nonnullis criticis partium externarum.

Indicationes peculiare quibus satisfieri debet, quò indicatio prædicta generalis adimpleatur, sunt minuire massæ sanguineæ copiam, ut exinde minus distenta vasa minima facilius restitui possint, ac fluida obstruentia expellant, tum etiam massam sanguineam fluxiliorem efficere minusque rarefiscibilem ac æstuosam, quò vasis laborantibus obsequiosa magis fiat & ita præterfluat. His satisfit indicationibus diætæ tenuis, sanguinis missionis, purgationis alvinæ aut per superiora, ac medicaminum incidentium, diluentium, interdum vero refrigerantium, lenientium, obtundentium, similibumve ope. Quæ omnia auxilia in genere inflammationibus curandis proficua esse docuit observatio, declarant verò rationes jam exponendæ.

LX. Et quidem institutâ diætâ tenui tum ratione quantitatis imminutæ alimentorum, tum ratione eorum consistentiæ minus spissæ ac tenacis, sufficitur sanguini chylus parciior dilutiorque, unde nec tantum reparatur massa sanguinea sensim proinde in mole imminuenda, produciturque tenuior ac fluxilior. Quamobrem si inflammatio acuta sit, si partem vitæ plurimum necessariam afficiat, si febris sit stipata, diætâ tenuissima erit insti-

tuenda; unde nutrietur æger vulgaribus jusculis ex carne vervecinâ paratis, insimul aquosum fluidum copiosè hauriet inter juscula, quò ulterius diluatur sanguis ac simul temperetur, ut aquam puram fontanam, aut aquam pane tosto leviter tinctam, quæ simul palato & stomacho gratior est sanguinemque leviter incidit dilutioremque efficit, aut capillorum veneris infusionem, quæ leviter etiam sanguinem attenuat sine æstu, aut ptisanam ex decocto radicis graminis & frustulorum aliquot malorum, quæ paululùm attenuat simulque refrigerat, simileve potulentum.

Si inflammatio summè sit æstuosa, ardens plurimùm, dolorifica, ab humorum acrimoniâ magnoperè pendens nutrietur æger jusculis ex carnibus vervecinis & vitulinis, aut ex carne vervecina & pullo juniore confectis nullo addito sale aut saltem paucò. Quoniam autem hæc est decoctum carniū sive jusculorum indoles, ut particularum sanguinis motum concitent ejusque calorem adaugeant hinc ut ejus æstus nimius in dato casu temperetur intermiscendi sunt jusculis ac exhibendi horis ordinatis cremores dilutiores ex oryza, aut avena, aut hordeo excorticato, aut spelta in aqua sola sine sale coctis; quin etiam si æstus summus sit interdicerda nonnunquam juscula quæque, si excipias tantùm jusculum ex pullo juniore simpliciter confectum, quod semel aut bis in die exhiberi poterit, æger nutriendus tunc erit cremoribus prædictis dilutioribus, aut quarum nonnullis aliquantum jusculi mitis & insulsi misceri poterit. Insimul in dato inflammationis casu potus erit decoctum aut oryzae aut hordei aut florum malvæ, aut eorundem florum cum semine lini, aut infusum florum nymphaeæ, aut ptisana ex radicibus altheæ & nymphaeæ parata, aut emulsio levis seminum quatuor frigidorum majorum, aut aqua pulli junioris; quæ omnia potulenta sanguinis motum intestinum compescunt. particulas ejus duras ac nimium mobiles acrimoniæ causas materiales inviscando magis aut minus ac leniendo, unde per accidens, nimirum pacato motu intestino exuperanti refrigerant. Porro potabitur æger eis fluidis variè selectis aut continuò aut identidem intermixta alia ptisana diluente pro vario morbi gradu, & casus exigentia. Postremò si inflammatio gravis haud fuerit nec ratione propriæ indolis nec ratione partis affectæ nec febre comitata, tunc æger ad dietam tenuissimam ita non reducetur, nutriri autem poterit offis, panatellis, ovis forbilibus, cremoribus spissis, quin etiam carne aliquali præsertim elixa, potabitur autem aut aqua sola, aut cui vini parum commisceri interdum poterit.

LXI. Cum autem multum infumatur temporis antequam dietæ ope minuatur sanguinis rubri copia (globuli namque ejus ac fibrosa pars ægrè destruuntur, diuque subsistunt) interea vasa sanguifera plurimùm laborent cum damno citò inferendo, hinc sit ut ex dietâ solâ sanatio confidenter expectanda non sit, minuendaque sit illico sanguinis rubri moles, quem in finem nullum invenit medicina auxilium præstans adeò ac venæ sectionem, quæ sane (imperata quidem dietâ congruâ) protinus celebranda

est, sanguinis namque missione citâ minuitur illicò moles sanguinis universa, hinc minor ejus copia ad vasa inflammata appellit, hæc exinde minùs distendantur, & ad se restituendum prona magis fiunt, sanguine sic faciliùs è vasis infarctis exprello cum insigni partis inflammata ac celeri levamine. Verùm evenit sæpe iterandam esse venæ sectionem, quò levamen sufficiens inflammata parti inferatur, cùm unica vice sanguine misso liberari aut multùm levari partem sæpè haud contingat, hinc venæ sectio pluries magis aut minùs instituenda erit, & vicibus singulis plus aut minus mittendum erit sanguinis, nimirum pro ægri viribus, vasorum plenitudine, affectæ partis ad vitam utilitate aut necessitate, dolore, temperamento, ætate, aliisve circumstantiis, quibus sanè omnibus simul Medicus prudens attendat oportet.

Cum autem missio sanguinis quævis evacuatoria sit, hinc fit ut quavis sectâ vena eo nomine nimirùm quod minuatur sanguinis moles, emolumentum inflammata parti accedat. At cùm aliunde sanguinis missio etiam proficua sit, eligenda hinc vena secanda. Nec enim eò solùm quòd minuta sanguinis protinùs mole vasa inflammata minùs infarctiantur, missio sanguinis per venam sectam præsens fit remedium, verùm etiam quòd in venam sectam sanguis juxta leges Hydraulicæ rapidiùs feratur, unde sequitur sanguinem pro data vena secta è parte data inflammata subito revelli posse, sic ut inde is in eam minùs extempore feratur vasaque inflammata subito à distensione propterea leventur; Sequitur etiam pro tali sectâ vena sanguinem in vasa infarcta talia uberius posse determinari sive derivari, ita ut exinde celeritate ejus adventùs crassæ molecule vasa infarciētes ultrâ propelli possint, modò vasorum tunicæ sanguinis ictui resistent nec eis succumbant. Unde patet venæ sectionem revulsivam inflammationi toties proficua fore quoties sanguis copiosus est in vasis affectis aut in eis valde æstuat (qui casus frequentior est) derivatoriam autem quoties vasa affecta inflammatione nec abundantiori sanguine nec æstuante adeò turgent, eo autem spissiori ac velut tenaci obstructa sunt, qui casus ita sæpe non obtingit. Quamobrem venæ sectio revulsiva in inflammatione longè frequentius derivatoriâ locum habet.

LXII. Jam verò cognitâ per anatomen vasorum distributione, tùm applicatis, ut pat est, Hydraulices legibus, patet in inflammationibus partium internarum capitis sectionem saphenæ plurimùm conducere, eo enim mittendi sanguinem modo sanguis ab eis revellitur, quod etiam præstat sectio jugularis; docuit interim experientia feliciùs in eo casu hæc secari venas celebratâ priùs in brachio phlebotomia, quæ quidem utut in rigore mechanices respectu capitis revulsoria sit, interea tamen cùm evacuatoria existat depletis itâ aliquatenùs sanguiferis cursuque sanguinis expeditiori facto revulsio libera magis & insignior è capite interno excitatur sectis saphæna aut jugulari; & eas propter rationes imperantur sectiones venarum brachii, saphenæ, & jugularis, in inflammationibus internis capitis.

Patet insuper in externarum capitis partium inflammationibus conducere sectionem venarum brachii non modo ut evacuatoriam verum & ut aliquatenus revulsivam, saphanæ ut magis adhuc revulsivam, jugularis ut derivatoriam.

Porrò inflammato pulmone venæ sectio quævis proficua est quatenus tantum evacuatoria, nulla enim est ejus respectu aut revulsiva aut derivatoria, nisi arteriæ bronchialis ramos obsideat inflammatio (qui casus rarior sanè eo est in quo arteriæ pulmonaris fines afficiuntur) & tunc venarum brachii ac pedis sectiones revulsoriæ ac derivatoriæ pulmonum respectu esse possunt quin earum natura certò determinari possit, ob variam in variis subjectis arteriæ bronchialis originem, licet tamen frequentius in eo casu saphanæ sectio derivatoria sit, cubiti autem venarum revulsiva.

Fit ex his ut seligi soleat venæ sectio è brachio; tùm, quòd minori apparatu cæteris instituat, citòque evacuet pulmonis respectu, cum promptissimo ejus levamine.

Inflammatis plevra cæterisque pectoris membraneis & carneis parietibus, missio sanguinis è brachio revulsiva est cum partes thoracis inferiores afficiuntur, è talo autem cum partes ejus superiores. Sed & sanguinis hæ missiones derivatoriæ sunt (sed è contra) nimirum partis pectoris superioris respectu venæ sectio brachii, inferioris autem partis saphanæ sectio.

Jam verò inflammatis partibus quibusque infra diaphragma positis missio sanguinis è brachio revulsiva est, è pede autem derivatoria.

Hæc omnia de venæ sectionibus jam prædicta comprobantur observatione, sanguinisque tantum missioni rapidæ imputanda sunt. Unde in effectus ligaturarum inquirere supervacaneum est, ligatura siquidem ante venæ sectionem injecta nihil parit notabilis, cum à parte affecta semper valde distet, cum diù perstare non soleat, & laxari eam extempore consuetum sit sectâ semel vena, cumque fasciatio finita missione sanguinis ita instituitur, ut cursui sanguinis libero per venam prius sectam neutiquam obsteret quocirca inquisitiones ejusmodi subtiles potiùs habendæ sunt & inanes quàm quicquam emolumenti in praxi afferentes, quin etiam suspectæ ac periculosæ censendæ sunt, cum in errorem juniores Medicos ducere queant aut saltem consilii inopes ac titubantes in auxilio per venæ sectionem ægris ferendo, adeoque infelices in praxi eos efficere.

His de missione sanguinis obiter prælibatis clarum fit, è quâ vena sanguis in inflammationibus sit mittendus, perpenſis & cognitis loco affecto & natura sanguinis infarctum inflammatorium producentis.

LXIII. Cum autem in praxi notum sit inflammationes partium à pravis succis è primis viis suppeditatis ac insipientibus noxiis qualitatibus sanguinem per sæpe foveri, consequitur eos esse eliminandos. Utcumque enim sanguinis missione repetita depletis vasis levarentur inflammatorii infarctus, attramen si à pravis illis succis sanguis spissiusculus continuo servaretur, aut æstuans, profectò immeabilis maneret semper vasaque infarcta

tandem occumberent. Hinc fit, ut præmissa missione sanguinis requisita; quò protinus levetur inflammatorius infarctus, ac sanguis ita mole imminutus minis vasa distendat cum exagitabitur à Pharmaco, statim atque suppetet occasio ad Pharmacum purgans incunctanter sit deveniendum: quod quidem præscribitur aut vomitorium, aut catharticum aut cathartico-emeticum, juxta varias indicationes desumptas è præsentia potiori saburræ aut in ventriculo, aut in intestinis, aut in utrisque illis cavitatibus notabili, è natura aut indole pravorum horumque succorum, tum etiam attendendo parti quæ inflammatione laborat, ægri viribus & aliis circumstantiis, quibus omnibus fit, ut Medicus interdum vomitorium, interdum catharticum, interdum emetico-catharticum seligat, indidem etiam Pharmaci purgantis energiam determinabit, seligendo illud tale vel tale in præsentia casu, dosim ejus præcipiendo, & sub quâ formulâ.

LXIV. Verum utut feliciter cedat purgatio, ad venæ sectionem sæpè iterum recurrendum est, cum causæ inflammationum remediis protinus non eradicentur, laborent interea plurimum vasa infarcta, nec nisi certis temporis intervallis iterari purgatio possit; hæc autem iterabitur quandiu inflammationem à pravis primarum succis foveri per signa Medico notum erit; hinc fit ut quamvis sanguinis missio purgationem in inflammationibus curandis antecedere soleat, ea tamen deinceps nimirum post purgationem iterum haud raro celebretur, sic ut pro re natâ nunc per sanguinis missionem nunc per purgationem in morbi decursu ægro feratur auxilium.

LXV. Ut autem præparetur, uti decet, alvina purgatio, aut juvetur incepta, intestina crassa interdum emollienda erunt aut lubricanda aut temperanda aut etiam purganda, hinc fit ut ante & post purgantium exhibitionem & operationem subsidiariò enemata præscribenda sint nunc emollientia, nunc demulcentia, nunc refrigerantia, nunc purgantia & quidem hæc variâ energiâ pro re natâ pollentia.

LXVI. Catharticorum itaque operâ pravi tum primarum viarum tum & massæ ipsiusmet sanguineæ expurgantur succi, emeticorum autem qui in ventriculo tenaces hospitabant, sic sanguis ab eorum liberatur insultu, ita ut pristinam per solas circulationis causas exagitantes interdum recuperet fluxilitatem, si spissior antea fuerit, vel etiam compescatur nec rarefcat ampliùs impensè, sublatis ita particulis vitiosis ac heterogeneis motum ejus-agitativum nimis incitantibus, sic sanguis fit meabilis per inflammata partis vascula. His etiam accedit emeticorum ac purgantium actione fluidorum massam attenuari sive incitatâ solidorum actione sive attenuatis medicamentosarum particularum energiâ fluidorum moleculis, unde & eâ de causâ sanguis magis fit meabilis. Verum utcumque purgantia procuratâ evacuatione fluxilitati sanguinis restituendæ plurimum conducant, ejusque pravam diathesim emendent, quin imò particulis medicamentosis eum attenuent, requiruntur sæpè etiam medicamina alia, quò prava san-

guinis diathesis ulteriùs emendetur.

LXVII. Quamobrem si sanguis crassus sit ac viscosus , pelliculam spissam tenacem subflavam in superficie thrombi cum missus fuit in scutellam exhibens , quique *inflammatorius* vulgò dici solet , quòd ita constitutus in morbis inflammatoriis esse soleat , tunc attenuantia in usum vocanda sunt vique hydroticà pollentia. Circà quæ animadvertere juvat , 1^o. Ea in nostris regionibus adhibenda non esse , nisi rarissimè , valida , quòd in nostris hominibus sanguis in rarefcentias ità notabiles ab eis ducatur , ut inmeabilis ulteriùs fiat aduëctis exin infarctibus inflammatoriis , tantò magis quòd vascula apud nos adeò robusta haud existunt ac in regionum septentrionalium incolis , proindeque distensionem rarefactoria facillè succumbant , plerumque ad crepaturam ducantur , aut saltem ad inflationem ex quâ vas in fluidum contentum exprimendum restitui haud quaquàm potest ; 2^o. Ejusmodi medicamina feliciter non succedere nisi præmissâ missione sanguinis , quòd sanguinem in rarefcentias concitent vasculis præsertim affectis molestissimas , depletis autem aliquatenùs vasis periculum tantum non subsit , ut ultramodùm distendantur vascula minima ; 3^o. Feliciùs adhuc ea succedere , expurgato priùs corpore , tum quòd sanguis sit tunc minùs tenax sublata partim causa inviscante , tum quòd utcumque sanguinis solvant tenacitatem , pravi succi è primis viis accedentes iterùm eum spissiore reddant , cum nullo proinde percepto ab eis medicaminibus levamine , noxa autem potiùs inde superstitè æstu nimirùm majori quam antea medicaminum horumce vi excitato.

His prænotatis patet quænam feligenda sint attenuantia ac quibuscum cautionibus præscribenda veniant. Attenuantia , quibus in morbis inflammatoriis utimur præter ptisanas aliaque potulenta de quibus antea (60.) mentio facta est sunt decocta cornu cervi , florum papaveris rheados , foliorum cichorii , borraginis , buglossi , item succus cichorii & potissimum borraginis ; cum autem potentioribus utendum hydroticis in usum veniant antimonium diaphoreticum , antihecticon Poterii , sanguis hirci sylvestris exsiccatus , quibus quidem cum res postulat admiscemus compositiones galenicæ hydroticæ simul & cardiacæ , ut confectio de hyacintho , alkermes , theriacam , syrupum florum tunicæ , kermesinum , & similia. Ea autem medicamina sub potionis forma potissimum usurpantur , quare advocamus pro vehiculo aquas distillatas cichorii , scabiosæ , cardui benedicti , florum aurantium & similes ; his autem potionibus attenuantibus , quò feliciùs succedat diaphoresis , adeoque per cutem plurimum particularum morbificarum evacuatio , narcotica sociamus ut syrupum papaveris albi , & ad notabiliorem effectum laudanum opiatum , potissimumque laudanum liquidum *Sidenhami*.

LXVIII. At verò si sanguis æstuosus sit & acrimonia pollens , alterantia , quæ præscribuntur , in genere edulcorantia ac refrigerantia erunt , seligentur autem potissimum edulcorantia , si acrimonia insignis in sanguine

reliquisque fluidis demonstretur, quare præter jam proposita (60.) in usum venient emulsionem ex seminibus quatuor frigidis majoribus paratæ, decoctum aut etiam mucilago seminum lini, cydoniorum, oleum amygdalarum dulcium, gummi arabicum, tragacantha, syrupus althææ, nymphææ, æluropi, violatum. Si verò æstus summus sit summaque sanguinis rarefcentia, ad ea potissimum, quæ protinus refrigerant, erit confugiendum, quæ quidem de natura acidâ potissimum participant, quæque sanguinis rarefcentias impetuosas citò compescendi potestatem esse datam docuit experientia; talia sunt nitrum depuratum insigne illud antiphlogisticum in Germania imprimis usus maximi, sal prunellæ, succi acetosæ, acetosellæ, limoniorum, grossulariæ, oxyacanthæ, granatorum, mororum, agrestis, & qui parantur ex eis succis syrupi; spiritus vitrioli, sulphuris, salis dulcificatus, nitri dulcificatus.

LXIX. Postremò cum ea sit inflammationis indoles ut dolorem individuum comitem habeat, ex eoque intendatur vis solidorum (quæ trangitur dein si producatur diutius) exagitentur fluida impensius rarefcent minusque fiant meabilia, quæ omnia excitari non possunt sine gravi anxietate, agrypnia, inflammationis augmento, interdum spasms, deliriis, æconomix animalis turbâ, prostratione virium, ac sæpius corporis viventis ruina totali; propterea narcotica in morbis inflammatoriis, ceu præsens ac divinum remedium, frequentius præscribuntur, & ea quidem quæ è papaveribus eruuntur, ut sunt syrupus papaveris albi ac *Laudana* quæquæ idiomate barbaro à *Paracelso* primò nuncupata, sive solida fuerint sive liquida, inter quæ præferre juvat laudanum opiatum simplex, & laudanum liquidum sydenhami.

Porrò narcotica non solum sejuncta in casibus inflammationum præscribenda sunt, verum etiam medicaminibus pluribus aliis sociata, uti edulcorantibus, lenientibus, refrigerantibus, ut & attenuantibus & hydroticis; cum enim dolorem tollant, sedantium & compescentium medicaminum vim proficuum magis efficiunt; cumque ipsamet sedent simulque attenuent, attenuantium & hydroticorum adaugent efficaciam absque tanto orgasmo & tumultu solidorum & fluidorum principio vitali semper infenso.

LXX. Quæ hucusque proposita fuere remedia ad curam inflammationis cujuscumque spectant, sive eâ laborarint internæ corporis partes sive externæ. Jam quæ externarum præsertim inflammationibus insuper opitulantur recensenda sunt; *Topicorum* nomine vulgò cognita. Et quidem cum partes habitus corporis actioni medicaminum immediatæ obnoxie existant eis inflammatis ferre opem applicatione immediatâ æquum fuit; quæ quidem applicationes topicæ tanti sunt interdum momenti ut etiam partibus profundis, quin imò internis nonnullis proficue sæpè sint. Quamobrem juxta inflammationis indolem, partem affectam, morbi tempus, tendentiam ad variam terminationem, aliasque circumstantias topica varia & ratione nar-

ture & ratione formæ seliguntur.

LXXI. Ratione inflammationis indolis, 1^o. nunc topica conveniunt lenientia & anodyna, ut oleosa dulcia, mucilaginosa insipida, mucilaginosa dulcia, aquea, nimirum cum inflammata pars aut æstu valde torquetur, aut tensa admodum est sicca & dolens, aut acrimoniâ magnopere defatigatur; hujusmodi enim topicis relaxantur fibræ, fluida rarefcentia compescuntur, ac diluitur vel inviscatur acra. Topica ejusmodi sunt balnea, fots, suffitus, litas sive embroches, cataplasmata, quibus perficiendis inserviunt aqua dulcis tepida, decocta & pulpæ plantarum emollientium, florum & seminum vi simili pollentium, lactis variæ species, serum lactis, butyrum recens, vitelli ovorum, oleum amigdalorum dulcium, vitellorum ovorum, rosatum ac similia, mica panis albissimi, albumen ovorum, sperniola, farina secales, lini, aliaque indolis similis.

2^o. Nunc topica usurpanda sunt actiosa, attenuantia, resolventia, eaque aut spiritiosa, aut salina, aut aromatica, & quidem energiæ variæ (nimirum cum fluida inflammatam partem occupantia crassitie ac spissitudine admodum peccant, vasa autem & fibræ multum tensa non sunt nec dolentia) cujusmodi sunt vinum, vini spiritus, camphora, plantæ quæ dicuntur aromaticæ, flores aromatici & cephalici, semina dicta vulgò calida & alia quæque aromatica, flores camæmeli, meliloti, sambuci, ac similes, salis ammoniaci solutio, ac similia quæ quidem omnia medicamina sub formulis prædictis ut cætera topita pro re natâ adhibentur, & quidem interdum emollientibus temperata, ut cum indicatio ad resolvendum simplex non est, insimulque partis textus est relaxandus vel ut determinatus solventis gradus obtineatur.

3^o. Interdum & stupefacientia in auxilium vocanda sunt, cum scilicet dolor est intolerabilis, quò partis ipsiusmet dolor compescatur, cui usui inserviunt magno cum emolumento hyosciamus, solani species ac potissimum solanum scandens bacciferum, papaveris folia capita, mandragora, sive ex eis decocta fiant ut fots parentur aut suffitus, sive folia memoratarum plantarum leviter attrita parti applicentur, sive ex eis plantis parentur pulpæ & cataplasmata sæpe adjuncto lacte adhuc magis proficua, sive earum succi adhibeantur. Eidem scopo adimplendo præstans etiam fit remedium ipsummet opium ut & laudanum sive soluta fuerint sive neutiquàm. Cum autem ea quæque usurpanda sunt topica ab inflammationis indole indicata, naturæ partis affectæ est attendendum; partibus enim teneræ ac sensibilis texturæ, non adeò actiosa in propriâ specie competunt, ac robustis densisque, sic oculi, auris, oris, urethræ, vaginæ, ani, similiumque partium inflammationibus quæ applicanda sunt topica, tantâ quidem energia pollere non debent ac ea quæ partibus densis ut musculosis, cutaneis; partes enim raræ plus porosæ existunt ac densæ, inde priores vim medicamento- sam posterioribus magis suscipiunt. Ubi quidem animadvertere interest topica, utut sæpius inflammationibus externis proficua sint, in earum non-

nullis quæquæ interdum nocua existere, proindeque, ut inferius declarabitur, esse interdicenda.

LXXII. Sed & pro variis morbi temporibus topicis ad inflammationes curandas diversimodè utendum est. Ita in principio nonnullarum inflammationum applicantur percussiva ut aqua frigida, oxycraturum, agresta, ovorum albumina cum farina subacta, quæis profectò abstinendum est in augmento & statu, quòd in principio vasa adhuc admodum infarcta non sunt, sæpèque integra manent, è contrà verò in augmento & statu, quæmobrem in hisce duobus temporibus nè à percussivis fluida penitus in vasculis sistantur, mortificatione hinc subsequetur, periculum evidens est. In augmento sæpiùs congrua sunt anodyna & demulcentia suprà exposita (71.) quò fluidorum rarefcentiæ nimix incrementum temperentur, vasorumque tunicæ ab augescente violenta tensione vindicentur, proindeque quò inflammationis incrementum aliquatenus refrænetur, compescaturque ferocia. In statu non solum ob prædictas rationes anodyna demulcentia applicantur, verùm & anodyna stupefacientia (71.) cum dolor intolerabilis sit, quin & cum casus exigit (71.) eo tempore adhiberi solent resolutiva (71.) quòd tunc temporis infarctus tenacitas existat maxima, viresque vasorum ne succumbant metus sit. Postremò in declinatione topica non nisi resolutiva congrua sunt, cum resolutio nimirum incepta his tantum juvanda sit medicaminibus.

LXXIII. Jam verò juxta variam ad exitum tendentiam inflammationibus topicorum opera diversimodè opitulandum erit. Quare 1º. si tendat inflammatio ad resolutionem ea erit utique juvanda resolventibus (nisi casus adsit inflammationis criticæ, in quâ expetitur suppuratio, ubi quidem suppurantia adversus conamen ipsum naturæ erunt applicanda) porrò seliguntur resolutiva vario actionis gradu prædita, prout casus indicabit, quin & interdum temperabuntur lenientibus quò expetita succedat resolutio. 2º. Si tendat ad suppurationem inflammatio ea quidem promovenda erit maturantibus, frustanea namque tunc fierent resolutiva, cum opus illud naturæ inceptum denotet vasa fuisse rupta ac fluida in eis demortua actione integrorum disponi ad exitum sub forma liquaminis purulenti; hinc fit ut in tali partis statu ipsamet resolutiva evadant sæpè maturantia, cum ab eorum energia suppurationis causâ efficiens actio nimirum vasorum integrorum in vasa rupta tunc concitetur, nec nisi puris productio inde expectari possit. Unde in eo casu pars ab infarctu inflammatorio liberari nequit nisi suppuratione prævia, quâ peracta expurgatoque penitus pure vasa integra ab infarctu inflammatorio liberantur deinceps per resolutionem, sanasque tandem fit pars cicatrice subortà. 3º. Si tendat inflammatio ad mortificationem ea quidem variæ actionis topicis erit præcavenda, nimirum interdum lenientibus ac emollientibus, interdum è contrà ætiosis resolventibus. Et sanè emollientia ac lenientia imponenda erunt, si ad mortificationem dispositio tensione nimia æstu summo ac diris doloribus

significetur ; quò nimirum fluidorum vasa rumpentiam temperetur ferocia , fibrarum autem elasticitas nimia ac reactio in fluida minuatur , simulque ut imminuta per emolliationem tensione , ea ad rupturam proclives adeò non fiant. E contrà verò si ad mortificationem proclivitas caloris & doloris imminutione non expectatà , tum verò partis mollitiæ mutationeque coloris rubri ad livescentem manifestetur tunc sanè topicis utendum erit actuosis ac resolventibus , quò cadentes vasorum vires excitentur , fluidorum autem inertia erigatur. Postremò cum inflammatio tendit ad indurationem , ea resolventibus utique , salinis præsertim aut resinosis , præcavenda erit , eis autem variæ energix gradu pro re natâ præditis , quibus etiam interdum emollientia socianda erunt ; quò scilicet incidantur fluida lymphatica inertia , simulque humescan obsequiosaque magis fiant & eamet & vascula , faciliorque exin procuretur fluidi progressus.

LXXIV. Et hæc circà inflammationum Therapeiam , tum & circà inflammationis Historiam generalem allata sufficere volumus. In quâ quidem immorati paulò diutius forsan vide-remur , Tractatum tradendo Medico-Chirurgicum , nisi morbus is non modò sejunctus , verum etiam cum tumoribus pluribus aliis imò cum vulneribus , ulceribus , fracturis ac luxationibus sæpè complicatus frequens adeò observaretur , ut absque cognitione ejus absolutâ in tradendâ Pathologia Chirurgicâ nonnisi per caliginem procedere quis possit.

Cæterum quæ de inflammatione hucusque prolata sunt probè intellecta in pertractandis tumoribus inflammatoriis lucem adeò ferent , ut eâpropter sermo contractior deinceps futurus erit. Tumores itaque inflammatorios externos juxta propositum (XI.) jam aggrediamur.



Tabula Complexctens varias de quibus agitur
in hoc volumine materias

- primo. Dissertatio de purgatione. 1662.
2^{do}. De affectu cataleptico rarissimo. 1682.
3^o. De morbo Catarrhali benigno, epidemico. 1762.
4^o. De regno minerali, et historia et theoria morborum particularium. 1761.
5^o. De tamen, Specimen academicum. 1746.
6^o. De motu sanguinis Circulatione, ad mentem hypercratis.
7^o. De limitidine praeacis medica repurgata. 1729.
8^o. De animi, et corporis condensatione, mirabili, tam in secunda
quam adversa valitudine. 1730.
9^o. De scorbuto.
10^o. De hydropse ascite.
11^o. De arthritide.
12^o. De febribus continuis, et intermittentibus. 1758.
13^o. De hernia ventrali. 1746.
14^o. De ruptura lienis.
15^o. De curatione morborum hypercraticorum.
16^o. De inflammatione aurium.
17^o. De lacerationibus cranii, a causa externa, violenta.
18^o. De cane obliquo.
19^o. De superfluis et noxiis quibusdam in chirurgia.
20^o. De variatione anatomica paralytici.
21^o. De positionibus aliquor illorum.
22^o. Curatio virginis hydroptica.
23^o. De phlegmone et erysipellate.
24^o. De tumoribus in genere, ac potissimum de inflammatione.

